

ՎԱՆԻ ՆԱՀԱՆԳԱՊԵՏՈՒԹԵԱՆ
ՊԱՏՄՈՒԹԻՒՆԻՑ
(Յունիս 14-Յուլիս 7-Յուլիս 25, 1915) ԵՒ
Ա-ԴՕՆ

ՌՈՒԲԵՆ ՍԱՀԱԿԵԱՆ
rubensahakian@mail.ru

Առաջին Համաշխարհային Պատերազմի տարիներին (1914-1917) թուրքական կառավարությունը իրականացնում է Արեւմտեան Հայաստանի եւ Փոքր Ասիայի հայաբնակ գաւառների հայութեան ցեղասպանութիւնը: Նման դժնդակ պայմաններում հայութիւնը կարողանում է մի շարք վայրերում, ինչպէս օրինակ՝ Վանում եւ համանուն նահանգում, Տարօնում, Շապին Գարահիսարում, Մուսա Լեւան վրայ, Յընտըճագում, Ուրֆայում եւ այլ վայրերում դիմելու ինքնապաշտպանութեան¹: Առաւել յաջող դիմադրութիւն են ցուցաբերում Վանի հայերը, որը զգալի թուով մարդկանց փրկուելու հնարաւորութիւն է տալիս:

Վանի նահանգապետ Զեւդէթ բէյն ունենալով մօտ տասն անգամ գերակշիռ ուժեր, հրետանի եւ զնդացիներ, չի կարողանում կոտրել հայութեան դիմադրութիւնը: Նրանց պայքարն ու ռուսական բանակի եւ նրա կազմում հայկական կամաւորական խմբերի յաւաքացումը նպաստում են որ Վան քաղաքի հայութիւնը յաղթանակած դուրս գայ անհաւասար պայքարից:

1915 Մայիսի 7ին ռուսական հրամանատարութիւնը Արամ Մանուկեանին, կամ էլ ինչպէս նրան որակել է Վարազդատ Տերոյեանը՝ «Վանի հասարակական հսկային»², նշանակում է Վանի եւ ազատագրուած գաւառների ժամանակաւոր կառավարիչ (նահանգապետ): Ինչպէս նշում է Վան այցելած Ա-Դօն (Յովհաննէս Գրիգորի Տէր-Մարտիրոսեան, 1867-1954)՝ «Ռուս բանակի հրամանատարը գնահատեց հայ ժողովուրդի միայնակ պայքարը ու տարած յաղթանակը եւ հրավիրեց Վասպուրականը կառավարելու համար Վանի կռիւները դեկավարող Արամին, լիազօրելով նրան կազմել հայկական ժամանակաւոր կառավարութիւն»³:

Վասպուրականում հայկական իշխանութեան հիմնումը պատահական չէր: Դա արդիւնք էր մի քանի սերունդների հետեւողական գործունէութեան: Նրանք կաթիլ-կաթիլ, դարեր շարունակ, բնակչութեան շրջանում սերմանել էին պետականութեան գաղափարը:

Կազմակերպւում են ազատագրուած գաւառների եւ Վան քաղաքի կառավարման մարմինները՝ նահանգային խորհուրդը եւ վարչութիւնը, կրթական եւ ոստիկանական տեսչութիւնները, քաղաքապետարանը, գաւառային վարչութիւնը, դատարանը եւն.:

Կարօ Սասունու բնորոշմամբ՝ «Հայոց ճակատագիրը գործնական կեանքի մէջ սնօրինող հաւաքական կամքը թիֆլիսէն եւ Երեւանէն փոխադրուած էր Վան: Պատգամը Վանէն կու գար»⁴:

Հայութեան համար Վանը դարձել էր «Աւետեաց երկիր», ուր ձգտում էին օր առօր Հասնել շատերը, որպէսզի անձամբ համոզուեն, որ տեղի Հայութիւնը ոչ միայն փրկուել, այլեւ սկսել է արարել հայոց պետականութեան սաղմը՝ Վանի նահանգապետութիւնը:

Վանի նահանգապետութիւնը հարկադրուած էր լուծել բազմաթիւ հիմնախնդիրներ՝ սկսած գաղթականներին իրենց բնակավայրերը տեղափոխելուց, մինչեւ նրանց անվտանգութեան ապահովումը: Այդ նպատակի համար կազմակերպուում են մի շարք մարմիններ: Վանը բաժանուում է գաւառների եւ գաւառակներին: Նշանակուում են նրանց ղեկավարները: 1915 Մայիսի 7-22ին նահանգապետի կողմից կատարուում են հետեւեալ նշանակումները.

Ա. Կալուածական-Փաղթականական Մարմին. - Արտակ Գարբինեան (նախագահ), անդամներ՝ Աւետիս Թերզիբաշեան, Ա. Միրզախանեան, փաստաբան Կարապետ էֆենդի եւ Հ. Ժամազործեան:

Բ. Քաղաքապետութիւն. - Պետրոս Մէօզէեան (նախագահ), անդամներ՝ Վ. Տէր-Պօղոսեան, Վահան Մարութեան, Սիմոն Գափամաճեան եւ Ա. Վուլուներկեան:

Գ. Դատարան. - Աղաբէկ էֆենդի (նախագահ), անդամներ՝ Ռուբէն Շատուորեան, Թերզան էֆենդի (գործադիր պաշտօնեայ), Ե. Քաջունի եւ Հրանտ Գալիլեան (դատախազ):

Դ. Տնտեսական Մարմին. - Գէորգ Ճիտէճեան (նախագահ):

Ե. Ընդհանուր քննիչ. - Կարապետ էֆենդի Այճեան:

Զ. Նպաստից Յանձնաժողով. - Հ. Մկրտիչեան (նախագահ), անդամներ՝ Գ. Պարիկեան, Փ. Մարութեան, Ա. Պարսամեան, Կ. Գափամաճեան եւ Պ. Թաշճեանը:

Է. Տների Յանձնաժողով. - Մ. Հիւսեան (նախագահ), անդամներ՝ Մ. Երամեան, Ա. Խոճամիրեան եւ փաստաբան Կարապետ էֆենդի:

Ը. Կրթական Մարմին. - Մ. Մինասեան (նախագահ), անդամներ՝ Մ. Նալպանտեան, Ե. Ռչտունեան եւ Ռ. Մելիք-Արամեան:

Թ. Երկրագործական Մարմին. - Խաչիկ Զենոբեան (նախագահ), անդամներ՝ Ա. Աւետաղայեան, Ռոպինսոն Գլճեան⁵:

Գաւառների Եւ Գաւառակների Ղեկավար Կազմը

1. **Շահպաղի գաւառապետութիւն.** - Աբէլ Աղաւնեան (գաւառապետ), Մինաս Օւրիկեան (օգնական), Ստեփան Համբարձումեան (թարգմանիչ):

2. **Արտամետի գաւառապետութիւն.** - Յովհաննէս Գոմէճեան (գաւառապետ), Լ. Մելիք-Դատեան (թարգմանիչ-օգնական):

3. **Ոստանի գաւառապետութիւն.** - Լեւոն Գաբրիէլեան (գաւառապետ), Զաւեն Կորկոտեան (օգնական), Հ. Փալպաքեան (թարգմանիչ):

4. **Ալիւրի գաւառապետութիւն.** - Հ. Հիւսեան (գաւառապետ), Ա. Շարճեան (օգնական), Ս. Առաքելեան (թարգմանիչ):

5. **Կիւսնենցի գաւառապետութիւն.** - Փ. Մարութեան (գաւառապետ):

6. **Արճէշի գաւառապետութիւն.** - Նշան Ժամազործեան (գաւառապետ), Գ. Թովմասեան (թարգմանիչ):

7. **Արճակի գաւառապետութիւն.** - Շիրին Եղիազարեան (գաւառապետ), ոստիկանապետ՝ Տաղվերանցի Միօ:

8. **Գործօթի գաւառապետութիւն.** - Գազիկ Թոխմարեան (գաւառապետ):

9. Հայոց Զորի գաւառապետութիւն.- Նշան Նալպանտեան (գաւառապետ), Ն. Մելքեան (ոստիկանապետ), Ս. Համբարեան (թարգմանիչ):

10. Շատախի գաւառապետութիւն.- Ս. Մեսրոպեան (գաւառապետ), Ա. Պաղտասարեան (ոստիկանապետ):

11. Ճանիկի գաւառապետութիւն.- Ա. Սեմերճեան (գաւառապետ), Ս. Տէր-Սիմոնեան (ոստիկանապետ):

Նշենք, որ գաւառապետերի կազմի մի մասը յետագայում փոփոխուում է: Կատարուում են նոր նշանակումներ:

Այդպեստանի եւ Քաղաքամէջի պաշտօնեաների եւ ոստիկանների ընդհանուր թիւը կազմել է 152, իսկ գաւառներինը (ոստիկանութեան հետ միասին)՝ 850 հոգի⁶:

Առաջնահերթ խնդիրներից էր գիւղատնտեսական աշխատանքների վերսկսումը, որը հնարաւորութիւն կը տար ապահովել ոչ միայն բնակչութեան, այլեւ ռուսական զօրքի եւ հայ կամաւորների մատակարարումն անհրաժեշտ մթերքներով: Սակայն երկրագործական աշխատանքները դժուարանում էին այն պատճառով, որ լեռներում շարունակուում էին գործել քրդական զինուած կազմաւորումներ⁷, որոնք յարձակումներ էին կատարում հայկական բնակավայրերի վրայ՝ արգելելով հացահատիկի հաւաքումը:

Արամը գիտակցելով, որ բնակչութեան անվտանգութեան ապահովութիւնն առաջնահերթ խնդիրներից է, ձեռնամուխ է լինում ոստիկանական ուժերի կազմակերպմանը: Նրանց հիմնական խնդիրն էր՝ հայկական, ասորական եւ եզդիների գիւղերի պաշտպանութիւնը: Կարելի է ենթադրել, որ Արամը ոստիկանական ոյժերի հիմքի վրայ յետագայում ցանկանում էր կազմակերպել բանակային ստորաբաժանումներ:

Վանի նահանգում տարածուած էին տարափոխիկ հիւանդութիւնները, ուստի նահանգապետութիւնը դիմում է Ամենայն Հայոց Կաթողիկոս Գէորգ Ե-ին, Կովկասի Հայոց Բարեգործական Ընկերութեանը (ԿՀԲԸ), Թիֆլիսի Հայոց Ազգային Բիւրոյին եւ այլ կազմակերպութիւնների, խնդրելով օժանդակել այդ խնդրում: ԿՀԲԸ Վան է գործուղում լիազօր Աբովեանին, բժիշկներ Համազասպ Օհանջանեանին ու Քոչարեանին, նրանց հետ նաեւ երեք բուժակ եւ մէկ հիւանդապահ⁸: Յունիսի 20ին Վան է ժամանում Աղթամարի կաթողիկոսական տեղապահ եւ էջմիածնի Եղբայրական Օգնութեան Կենտրոնական Յանձնաժողովի ներկայացուցիչ Սահակ արքեպիսկոպոս Այվատեանը⁹: Նրա նախագահութեամբ կազմուում է «Վասպուրականի Եղբայրական Օգնութեան Յանձնաժողովը», որում ընդգրկուում են Ա. Մանուկեանը, Սիրական Տիգրանեանը, Մարտիրոս Նալբանդեանը, Փանոս Թերլեմեզեանը եւ Յովհաննէս Մկրտիչեանը: Յանձնաժողովի առաջնահերթ գործը եղել է բուժարան բացել բժիշկ Թաշճեանի¹⁰ գլխաւորութեամբ: Հեռագրուում է էջմիածին, խնդրելով շտապ կարգով Վան ուղարկել բժիշկ եւ դեղեր, եւ բացել հիւանդանոց 55 մահճակալով¹¹:

Սեժ քանակութեամբ մարդկանց կուտակումը Վանում սրում է քաղաքի առողջապահական վիճակը: Յունիսի 7ին նահանգապետի օգնական Պարոյր Լեւոնեանը գրում է. «Համաճարակը աստկանում է: Անհրաժեշտ են բժիշկներ, ֆելդշերներ¹², դեղորայք: Սով է սկսում: Պէտք է միջոցներ ձեռք առնել օգնութիւն հասցնելու համար: Արամի վարչութիւնը անում է նոյն իսկ անհնարինը: Խիստ կարիք կայ ինտելիգենտ ուժերի»¹³:

Վանի հայկական իշխանությունը հաշուի առնելով, որ հայ, ասորի, եզդի, ինչպես նաև քուրդ ու թուրք բնակչությունը քիչ թիվ չատ վարժուած է օսմանեան օրէնքներին եւ նրա վրայ հիմնուած դատաիրաւական համակարգին, չի գնում կարուկ եւ արմատական փոփոխութիւններ: Նահանգի ղեկավարութիւնը եւ գլխաւորապէս Արամը, գիտակցում էին, որ օսմանեան օրէնսդրութեան արմատական վերանայումը կարող է յանգեցնել օրէնսդրական խառնաշփոթի, ուստի հրահանգուած է դատաիրաւական համակարգի աշխատակիցներին ժամանակաւորապէս առաջնորդուել օսմանեան օրէնքներով, իհարկէ, դրանց որոշ դրոյթներ վերանայելով եւ յարմարեցնելով ներկայ պայմաններին: Կարգադրուած է դատաիրաւական համակարգին, այդ թւում ոստիկանութեանը վերաբերող օրէնքները թուրքերէնից թարգմանել հայերէն եւ ներկայացնել նահանգապետարան: Օրէնքների նախագծերը կամ տարբերակները համապատասխան քննարկումներից եւ փոփոխութիւններից կամ ամբողջութեամբ հաւանութիւն ստանալուց յետոյ պէտք է դրուէին շրջանառութեան մէջ:

Մայիսի սկզբներին թուրքական բանակի նահանջից յետոյ Վանի մահմեդական թաղամասում մնացել էին թուրքերի կողմից լքուած 865 թուրք կանայք եւ երեխաներ¹⁴: Վանեցիներն, ի տարբերութիւն թուրքերի, քաղաքացիական բնակչութեան նկատմամբ որեւէ ոտնձգութիւն կամ բռնութիւն չեն կատարում: Թուրք համաքաղաքացիներին Վանի հայկական իշխանութիւնը տեղաւորում է ամերիկեան եւ գերմանական միսիոներական հաստատութիւններում: Աւելին, քաղաքային ոստիկանութեանը յանձնարարուած է ապահովել նրանց անվտանգութիւնը: Նահանգապետութիւնը հաշուառում է նրանց անշարժ գոյքը՝ տներն ու այգիները, ու կազմում դրանց մանրամասն ցուցակը, որը պահպանում է Հայաստանի Ազգային Արխիւում:

Յունիսի 23ին նահանգապետը եւ շրջանային վարչութիւնը յատուկ կոչով դիմում են հայրենակիցներին, խնդրելով օժանդակել Վասպուրականի բնակչութեանը: Նահանգապետարանը հայութեանը ներկայացնում է արդէն կատարուած աշխատանքների մասին՝ պատրաստուած են հիմնել երկու հիւանդանոց՝ մէկը տարափոխիկ, իսկ միւսը՝ ոչ-վարակիչ հիւանդութիւնների համար: Յաջողուել է հաւաքել 10,000 փութ ցորեն, կարիքաւորներին տրուել են 8-10,000 ոչխար եւ 3,000ից ավելի խոշոր եղջերաւոր անասուններ:

Սակայն առաջնահերթ վարակիչ հիւանդութիւնների դէմ պայքարն է: Նախատեսուած է նուազագոյնը մէկ բժիշկ՝ երկու դաւառի համար: Այսինքն՝ մէկ բժիշկը սպասարկելու է երկու հազար հիւանդի: Միաժամանակ կոչ է արուած երիտասարդութեանը՝ նուազագոյնը միքանի ամսով դալ Վասպուրական եւ ուժերն օգտագործել գաղթականներին օգնելու համար:

Հաշուառում են քաղաքում հայերին պատկանող մրգատու այգիները: Նրանց թիւը հասնում է 1400ի, սակայն մշակուած են միայն 625ը: Քաղաքապետարանը քայլեր է ձեռնարկում, որպէսզի անխնամ մնացած այգիները եւս մշակուեն եւ այդ նպատակով առաջարկուած են վարձակալման ցածր գներ¹⁵:

Հայկական իշխանութեան գործունէութիւնը միշտ չէ որ հարթ էր ընթանում: Նշանակուած պաշտօնեաների մի մասը ընդօրինակած լինելով նախկին յոռի բարքերը, թեթեւամտօրէն էին վերաբերում իրենց պարտականութիւններին: Ինքնուրուի նաեւ պաշտօնական դիրքի չարաշահման դէպքեր: Դժուար էր կարճ ժամանակահատուածում փոխել մի շարք մարդկանց մօտ արմատացած

Հոգեբանութիւնը, որի վրայ իր կնիքն էր դրել թուրքական երկարատեւ տիրապետութիւնը: Սակայն կարեւորը դա չէր: Կային նահանգային ղեկավարութիւն եւ իրենց գործունէութիւնը պարտաճանաչ կատարողներ, որոնց գործունէութիւնն օրինակ էր հանդիսանում միւսներէի համար: Իսկ ինչ վերաբերուում է անպարտաճանաչ պաշտօնեաներին, ապա նրանք հեռացուում էին ծառայութիւնից եւ փոխարինուում ուրիշներով¹⁶: Առաջին օրինակը ցոյց էր տալիս Արամը, որը կարողացել էր իր շուրջը հաւաքել յիրաւի նուիրեալ համախոհներ, առանց հաշուի առնելու նրանց կուսակցական պատկանելիութիւնը եւ սոցիալական ծագումը: Այսպէս, Վան քաղաքի ոստիկանապետ Դ. Փափագեանը ՀՅԴաշնակցութեան անդամ էր, իսկ փոխոստիկանապետ (ոստիկանապետի օգնական), 1915 Յունիսի 30ից ոստիկանապետի պաշտօնատար Ղ. Խանճեանը նախկին արմենական էր՝ Սահմանադիր-Ռամկավար Կուսակցութեան անդամ: Այդ կուսակցութեան անդամ էր Արտակ Դարբինեանը, որը յետագայում վարում է նահանգային Վարչութեան ղեկնապետի պաշտօնը: Դատախազ Հ. Գալիկեանը ՄԴՀԿուսակցութեան անդամ էր: Արամը այդ նոյն սկզբունքը կիրառում է նաեւ, երբ 1917ի վերջից հանդիսանում է Երեւանի Հայոց Ազգային Խորհրդի ղեկավարը, իսկ 1918 Յունիսի 24ից՝ Հայաստանի Հանրապետութեան առաջին Ներքին Գործերի նախարարը: Նա խնդիրներին մօտենում էր ոչ թէ որպէս քաղաքական, այլ պետական գործիչ:

Վանի նահանգապետութեան գոյութիւնը եւ աստիճանաբար առօրեայ գործունէութեան կարգաւորումը «անհանգստացնում» է ռուսական կառավարութեանը: Նրանց համար ցանկալի չէր, որ բացառապէս հայերից կազմուած այդ, թէկուզ ռուսական հրամանատարութեանը ենթակայ նահանգը, դառնար ապագայ ինքնավար Հայաստանի հիմքը: Բացի այդ, կառավարութիւնը խորապէս «անհանգստացած» էր Կովկասեան բանակի յաղթանակներով եւ դա այն դէպքում, երբ ռուսական բանակը ծանր մարտեր էր մղում ռուս-աւստրիական ռազմաճակատում¹⁷: 1915ի Յունիսի 11ին, առանց որեւէ լուրջ եւ հիմնաւոր ռազմական անհրաժեշտութեան Կովկասեան Դ. բանակի զօրամասերը հապճեպ նահանջում են: Նման հապճեպութիւնը հնարաւորութիւն չի տալիս հայերին կազմակերպել ինքնապաշտպանութիւն: Տարածւում են չափազանցուած լուրեր մեծաթիւ թուրքական զօրքերի յարձակման մասին: Իրականում հակառակորդը նման մեծաթիւ ուժեր չունէր: Թուրքական բանակի գերակշիռ մասը ծանր մարտեր էր մղում Դարդանէլի շրջանում՝ անգլո-ֆրանսիական ուժերի դէմ, ռուսի թուրքերը չէին կարող այդ ժամանակ մեծաթիւ զինուորներ ուղարկել ռուս-թուրքական ռազմաճակատ: Կարելի է ենթադրել, որ կեղծ նահանջը նպատակ ունէր.-

1. Վերացնել հայկական ինքնավար իշխանութիւնը,
2. Դրդել հակառակորդին՝ խորանալ իր կողմից աւերուած շրջաններ եւ ապա հակադարձակումով շրջապատել եւ ոչնչացնել թուրքերին¹⁸:

Մեր այս ենթադրութիւնը հաստատուում է համապատասխան փաստերով՝ Օգոստոսի 1ին Վանը վերազրաւելուց յետոյ ռուսներն այլեւս չվերականգնեցին հայկական իշխանութիւնը:

Յունիսի 23ին գեներալ Ն. Ն. Բարաթովի ռազմարչաւային կորպուսն անցաւ յարձակման: Յունիսի 25ին ռուսները գրաւեցին Կլիչ-Գեաղուկ լեռնանցքը, խամար եւ Դուլթախ գիւղերը: Նշուած գործողութեան ընթացքում փակուեց

թուրքական գործերի նահանջի ճանապարհը Եփրատ գետի աջ ափով: Սակայն, կովկասեան Դ. Բանակի ուշացած յարձակումը հնարաւորութիւն չտուեց իրականացնել հակառակորդի ուժերի շրջապատումը¹⁹:

*

Հրատարակուող փաստաթղթի հեղինակը՝ Յովհաննէս Գրիգորի Տէր-Մարտիրոսեանն (1867-1954) է՝ հայ մտաւորականութեան լաւագոյն ներկայացուցիչներէց: Նա գիտական հասարակութեանը յայտնի է Ա-Դօ անուամբ:

Ա-Դօն հայ հասարակութեան համար անծանօթ դէմք չէր: Նրա ուսումնասիրութիւնները վերաբերում են հայ ազատագրական շարժումներին, Արեւմտեան Հայաստանի ընկերային-տնտեսական կացութեանը, վարչական կառուցուածքին, բնակավայրերի եւ բնակչութեան վիճակագրութեանը: Սակայն խորհրդային տարիներին, ժամանակի նշանաւոր մտաւորականի գործունէութիւնը հիմնականում մնացել է ստուերում:

Ա-Դօն ծնուել է Նոր-Բայազէտում (այժմ՝ ք. Գաւառ՝ ՀՀ Գեղարքունիքի Մարզ): Սկզբնական կրթութիւնը ստանում է ծննդավայրում, որտեղ սովորում է միքանի տարի: 1881 Սեպտեմբերի 4ին Ա-Դօն տեղափոխուում է Երեւան՝ աւագ եղբօր մօտ, աշխատելու նրա խանութում: 1888 Յունուարի 23ին Մշակութիւթում լոյս է տեսնում Ա-Դօյի առաջին յօդուածը:

Աշխատելուն գուզընթաց, 1889-1891ին նա սովորում է Երեւանի թեմական Դպրոցում: 1905 Սեպտեմբերին ընդունւում է Խարկովի Համալսարանի Իրաւաբանական Ֆակուլտէտը որպէս ազատ ունկնդիր, սակայն Ռուսական Յեղափոխութիւնը (1905-1907) եւ ուսանողական յուզումները հնարաւորութիւն չեն տալիս աւարտել ուսումը եւ Ա-Դօն ստիպուած է լինում վերադառնալ Երեւան:

1903ին տպագրւում է Ա-Դօյի, ներկայիս գիտական հասարակայնութեանը համեմատաբար սակաւ յայտնի *Մակեդոնիա* գրքոյկը²⁰, որտեղ նա կատարում է հետաքրքիր հետեւութիւն, թէ՛ օսմանեան տիրապետութեան ներքոյ հեծեծող Մակեդոնիայի համար հակաթուրքական ելոյթների ազդակ է հանդիսանում օսմանեան կառավարութեան կողմից 1895 Մայիսի 11ին ընդունուած եւ Հայկական Նահանգներում նախատեսուող Մայիսեան Բարենորոգումների Մրազիւրը²¹:

Ա-Դօյի գրչին է պատկանում նաեւ մէկ այլ գրքոյկ, որը ներկայացնում է 1890ականների կոտորածների հետեւանքով ծննդավայրը լքած Վանի Վիլայէթի Արճէշ գաւառի Ախսրան գիւղի բնակիչ Մուրադին: Գիտնականը հետեւեալ սահմանումն է տուել գաղթականին. «...գաղթականը նա է, որ գուրկ գլուխը դնելու տեղից մի կտոր հացը կու է տալիս արցունքով թրջած, որի բերանից կ'լսէք Ախ՝ Վաթան... Ախ՝ Էրկիր... [բազմակէտերը հեղինակին են - Ռ.Ս.]²²»:

1905ի Ռուսական Առաջին Յեղափոխութիւնը հնարաւորութիւն է տալիս ռուս, ինչպէս նաեւ հայ առաջադէմ հասարակայնութեանը տպագրել մինչ այդ գրաքննութեան կողմից արգելուող մի շարք գրքեր: Ա-Դօն օգտագործում է ընձեռնած հնարաւորութիւնը եւ թղթին է յանձնում Միքայէլ Նալբանդեանին նուիրուած գրքոյկը²³:

1906ից մինչեւ 1908 Ա-Դօն ուսումնասիրում է ցարական կառավարութեան սադրանքով հրահրուած հայ-թաթարական (ադրբեջանական) ընդհարումները (1905-1906): Նա 1905 Յունիսին եղել էր Շարուրի եւ Նախիջեւանի գաւառներում, 1906 Հոկտեմբերին՝ Գանձակի նահանգում: Արդիւնքում ստեղծում է

մի աշխատութիւն, ուր փաստերի եւ ժամանակի մամուլի հիման վրայ ներկայացնում է այդ տարիների ողբերգական իրադարձութիւնները²⁴:

1908 Սեպտեմբերին մեկնում է Ս. Պետերբուրգ եւ ուսանում Հոգէ-նեարդաբանական Ինստիտուտում: 1909ի սկզբին գալիս է Երեւան եւ որոշում է իրագործել վաղեմի երազանքը՝ ուղեւորութիւն կատարել Արեւմտեան Հայաստան: Նոյն թուականի Յուլիի 22ին հատում է ռուս-թուրքական սահմանը եւ անցնում է Ալաշկերտի հովտում գտնուող Բայազէտ քաղաքը: Ուղեւորութիւնը տեւում է երկու ամիս եւ նա հասցնում է լինել Վանում, Մուշում, էրզրումում (Կարին) եւ այլ վայրերում: Ուսումնասիրութիւնների արդիւնքները գիտնակաւոր յանձնում է տպագրութեան²⁵:

1909ին Ա-Դօն հեղինակում է *Ազատագրական Շարժումը Ռուսաստանում*²⁶ աշխատութիւնը, որի համար ցարական դատարանը նրան դատապարտում է մէկ տարուայ բանտարկութեան, որը կրում է ներքին Ախտայի (այժմ՝ ք. Հրազդան, ՀՀ Կոտայքի Մարզ) բանտում:

1914ին իշխանութիւնները թոյլատրում են Ա-Դոյին հետազոտական աշխատանքներ կատարել Երեւանի Գիմնազիայի արխիւում եւ նիւթեր հաւաքել Խաչատուր Աբովեանի գործունէութեան վերջին տարիների վերաբերեալ (1843-1848): Ուսումնասիրութեան արդիւնքում նա պատրաստում է հետազոտութիւն, որի մի մասը տպագրում է Բաքում հրատարակուող *Գործ ամսագրի* 1914, թիւ V-VI եւ VII-VIII համարներում: Գիտնականը կարողանում է ճշդել Աբովեանի ծննդեան տարեթիւը՝ 1809: Յաւօք, Առաջին Համաշխարհային Պատերազմի պատճառով յետագայ հրատարակութիւնը դադարեցւում է:

Առաջին Համաշխարհային Պատերազմի տարիներին Ա-Դօն մասնակցում է հայ գաղթականութեան ինդիւրներով զբաղուող կազմակերպութիւնների աշխատանքներին: 1915 Յունիսի 14ից մինչեւ Յուլիսի 24ը, Ա-Դօն գտնում է Վանում եւ շրջակայ գաւառներում: Նա եւ իր ընկերներն ականատես են լինում զանգուածային աւերածութիւնների եւ սպանութիւնների հետեւանքներին, որոնք իրականացրել էին թուրք եւ քուրդ ջարդարարները: Գիտնականն աւօրեայ աշխատանքի հետ միասին սկսում է կատարել ուսումնասիրութիւններ, տեղեկութիւններ հաւաքել այս կամ այն բնակավայրի, բնակչութեան կազմի, տեղի ունեցած իրադարձութիւնների մասին: Ինչպէս վկայում է ժամանակակիցը. «Այս [Վանի նահանգի հայութեան կոտորածը եւ ինքնապաշտպանական մարտերի] ամբողջ անցքի մանրամասն նկարագիրը գրի էր առնում հրատարակելու Ա-Դօն. ուստի եւ աւելորդ եմ համարում հատուկտոր տեղեկութիւններ տալ»²⁷: Այս փաստը վկայում է Ա-Դոյի հայ հասարակութեան մէջ ունեցած գիտական եւ հասարակական հեղինակութեան մասին:

1919ից մինչեւ 1949 Ա-Դօն աշխատում է Հայաստանի Սպառնդական Ընկերութիւնների Միութիւնում (Հայկօօպ):

Ստորեւ ներկայացրուող փաստաթուղթը տպագրւում է առաջին անգամ, ուղղագրական եւ կէտադրական որոշ շտկումներով, սակայն ոճը պահպանելով: Փաստաթղթի վերնագիրը հեղինակինն է: Բնագիրը պահւում է Հայաստանի Պատմութեան Թանգարանի արխիւում: Փաստաթղթի պատճէնը մեզ է տրամադրել Ա-Դոյի դուստրը՝ տիկին Ադոլիան, որի համար յայտնում ենք մեր շնորհակալութիւնը:

Ծանր ժամանակաշրջան էր... (բազմակետերը փաստաթղթին են – Ռ. Ս.)

Առաջին համաշխարհային պատերազմը իր կործանիչ հողմապտոյտի մէջ քաշելով երկրագնդի խոշոր եւ նրանց յարող մանր պետութիւններին, թեակոխել էր երկրորդ տարին եւ զանգուածային բախումները ամեն տեղ շարունակում էին խելառ թափով: Խելակորոյս այդ պատերազմի մէջ նետուել էր նաեւ թիրքականը՝ ձեռնոց նետելով այն Ռուսաստանին, այն Ռուսաստանին, որի ձեռքից նա կրել էր մահացու հարուածներ XIX դարի ընթացքում տեղի ունեցած մի շարք պատերազմներում²⁸:

Սեւ Ծովի ափերից սկսած մինչեւ պարսկա-թիրքական սահմանի ամբողջ տեղորոքեամբ ռուսական եւ թիրքական բանակները բախուելով եւ յետ ու առաջ շարժուելով, հարուածը մեծապէս հասել էր սահմանամերձ թիրքահայ ժողովրդին, որը տեղահանուած եւ տարագիր ուղիներ բռնած դեգերում էր բնութեան դաժան մէկ ձմռան սառնամանիքներում, մէկ ամառային տապերում՝ կրելով եւ քաղց եւ ծարաւ եւ վարակիչ ախտեր ու մահ:

Այսպէս էր սահմանամերձ թիրքահայութեան դրութիւնը, սակայն աւելի սուսկալի դրութիւն վիճակուած էր սահմաններից հեռու, խորքերում գտնուող թիրքահայութեան համար: Ժէօն Թուրքիայի²⁹ ոճրագործ-բանդիտային կառավարութիւնը Աբդուլ Համիդից³⁰ ժառանգութիւն ստանալով հայաջինջ քաղաքականութիւնը՝ մէկէն անցաւ այդ դիւային ծրագիրն ի կատար ածելու:

Համաձայն Պուլսից ստացուած գաղտնի հրամանների ամեն տեղ հրապարակ քաշուեցին վայրենի յորդանները դեկավարութեամբ այն ոճրագործ ցեղապետերի, որոնք մինչեւ այդ որպէս դատուածներ³¹, պատերազմի պատրուակի տակ ազատ էին արձակուել: Անսպասելի, աշունը հայ մարդ[իկ] 15 տարեկանից վեր քշում էին բանտերը եւ զօրանոցները, [նրանց] կապկպում էին թոկերով 15-20-25 հոգիներ, քշում էին շէնքերից հեռու հեղեղատներում, գետաբերաններում ու ձորերի մէջ համազարկերով գնդակահարում եւ ապա սուլմահար անելով հեռանում էին, նորանոր շարքեր բերելու: Գեղեցիկ կանանց եւ դեռատի աղջիկներին առեւանգում էին ու տանում: Այդ զագիր գործողութիւններից յետոյ մնացեալ մասն զանգուածներով քշում էին դէպի Միջագետքի աւագուտները, որոնցից շատերը անկարող լինելով տանել գերեվարութեան գրկանքները, ընկնում-մեռնում էին զարդարելով իրենց անցած ճանապարհներն իրենց դիակներով: Իսկ կենդանի մնացած շատ փոքր տղաներ ու աղջիկներ վաճառքի էին հանում Դէր-Չօրի³² եւ այլ կենտրոնների շուկաներում, որոնք գնում ու տարում էին իսլամի հետետղների թիւր բազմացներու համար³³: Անպակաս էին նաեւ դէպքերը, երբ մարդիկ, կին, երեխաներ հարիւրներով լցնում էին տների ու գոմերի մէջ ու կենդանի բոցերի մէջ՝ խորովում:

Հայ ժողովրդի դարատր պատմութեան այս գերագոյն Սեւ ֆոնի վրայ երեք առկայծող կէտեր, որոնք մխիթարիչ ցոլքեր նետեցին համաժողովրդական վշտի ու մտորումների այդ պահին, հանդիսացան Վանի երկու քաղաքամասերի³⁴ ու Շատախի³⁵ ամբողջ մէկ ամիս տետող պաշարումը եւ հայ

ժողովրդի հերոսական դիմադրությունն ու պայքարը, որը եւ յանգեց թիրք պետութեան ամօթաբեր պարտութեանը ու փախուստին:

Վանի երկու քաղաքամասերը եւ Շատախը յաղթանակել էին, մի քանի տասնեակ հազարաւոր ժողովուրդ փրկուել էր բնաջնջումից եւ գոյութեան իրաւունքն էր շահել իր օրհասական ընդվզումով: Եւ ահա դէպի ազատագրուած Վանը շտապում էին շատերը, վշտահար ու սուկալի հաղորդումներն այդ ակտով սփոփանք գտնելու համար [sic!]:

Ռուսական բանակը առաջապահ ունենալով հայ կամաւորական գնդերը բաւականին առաջ էր գնացել Էրզրումի, Վանի եւ Բաշկալէի ուղղութիւններով ու թիրքական բանակը պարտութիւն կրելով ու նահանջելով, սրբում էր ճանապարհին որեւէ կերպ գոյութիւնը պահած հայ ժողովրդի աննշան բեկորները:

Պատմական օրեր էին. Վանում տեղական ուժերից կազմուել էր ժամանակաւոր հայ կառավարութիւն եւ շրջանի ղեկավարութիւնը յանձնարարուած էր նրան³⁶:

Ռուսական բանակը հայ կամաւորական գնդերով հանդերձ գործում էր լճի հարաւային ճակատում³⁷:

Վանի ազատագրումը առիթ հանդիսացաւ երկրորդ անգամ այցելել խոշոր անցքերի այդ վայրը: Ինձ թելադրում էին երկու հանգամանք՝ նախ տեսնել վեց տարի առաջ այցելածս Վանը ներկայ վիճակում, երկրորդ՝ մօտիկից ծանօթանալ եւ գրի առնել վերջին իրադարձութիւնները:

[1915] Մայիսի 14ին մեկնեցի Երեւանից եւ 17ին հասայ Վան: Քաղաքը մեծ մասամբ ւերուած է ու հրդեհուած, մի քանի հայկական թաղամասեր միայն կանգուն են մնացել: Այդ քաղաքի կենտրոնական մասն էր, ուր եւ դառնում էր ներկայ կեանքը: Նոյն պատկերը կրում էր նաեւ Վանի երկրորդ կէս մասը, հին քաղաքը³⁸, ատամնաւոր պարիսպներով շրջապատուած, որը ներկայումս միանգամայն ամայի էր:

Եւ շրջեցի երկու քաղաքամասերի բոլոր կրակակէտերը, որոնք ցերեկները գնդակոծումների հետեւանքով մեծապէս վնասում էին, իսկ գիշերները նորից նորոգում էին ու վերակառուցում³⁹ եւ այդ՝ անընդհատ, ամբողջ մէկ ամիս: Եւ այցելեցի հերոսական դիմադրութեանը մասնակցողներից աչքի ընկնողներին, այցելեցի հերոսական ակտեր կատարած կանանց, անգամ 10-12 տարեկան տղաներին, որոնք բերդի բարձունքից Քաղաքամէջ նետուած ռումբերին վրայ հասնելով ձգում-հանում էին պատրոյգները, ոչ միայն նրանց անվնաս դարձնելով, այլեւ նրանց մէջ եղած վառօդը փամփուշտների համար գործադրելով:

Ապա հետաքրքրուեցի ժամանակաւոր հայ կառավարութեան ֆունկցիաների ու կառավարման սիստեմի խնդիրներով: Եւ հանդիպում ունեցայ այդ կառավարութեան ղեկավար անձերի հետ: Սկսուել էր մեծ թափով շինարար աշխատանք բոլոր գծերով՝ պատկերը մխիթարական էր:

Աւարտելով Վանում կատարելիք աշխատանքս, առիթ հանդիսացաւ մեկնելու ճակատ, այն ճակատը, ուր գործում էին հայ կամաւորական գնդերը: Ծակատ էին մեկնում կամաւորական գնդերի հետ կապ ունեցող պաշտօնական անձեր՝ 7-8 հոգուց բաղկացած, որոնց թում նաեւ գրականագէտ-քննադատ Նիկողայոս Աղբալեանը⁴⁰: Եւ եւ միացայ այդ խմբին որպէս դիտող: Ինձ տրամադրուեց մէկ ձի եւ Յունիսի 28ին մեկնեցի ճակատ:

Մենք կտրեցինք Վան-Տոսայի, Հայոց Չորի գաւառների որոշ տարածու-
քիւններ, կտրեցինք նաեւ Գեաւաշ գաւառի լճափնայ լայնութիւնը, մի ճանա-
պարհ, որի վրայ եւ փոքր ինչ հեռու հետեւեալ պատմական վայրերը.

1. Պատմական Շամիրամի⁴¹ ջրով ոռոգուող բուսազարդ Արտամէտը, որը
հռչակուած է ծառապտուղներով եւ առանձնապէս խնձորներով:
2. Ճանապարհից դէպի հարաւ գտնուում է Չաղար Անշանի [Չաղար Ս.
Աստուածածին] վանքը, որտեղ պահուում է V դարի քաղցրախօս Եղիշէի
գերեզմանը:
3. Արտու լեռան հիւսիսային փեշերի ու Վանի լճի հարաւային ափերի վրայ
մէկ բուսազարդ հովտում փռուած է Ոստան ասանը՝ նախկին Ռշտունեաց
իշխանի կալուածքն ու ամրոցը, որում ապրում էին քիւրդեր եւ որպէս
Գեաւաշի վարչական կենտրոն երկու ամիս առաջ նստում է[ր] թիւր-
քական կայմակաւնը, իսկ ներկայում վարում էր գաւառը հայ կառավա-
րութեան գաւառապետը⁴²:
4. Աղքամարի կղզին ու նրա դրսի տունը՝ բուսազարդ Ախավանքը⁴³, նախ-
կին Գագիկ Արծրունու⁴⁴ ապարանքն ու ամրոցը, որում գտնուում էր շրջա-
կայ մի շարք գաւառների հոգեւոր կենտրոնը:
5. Ախավանքից ոչ հեռու, դէպի հարաւ-արեւմուտք գտնուում է Նարեկի վան-
քը, որի ետեւի խորանում պահպանուում է XI դարի բանաստեղծ ու
մատենագիր Գրիգոր Նարեկացու գերեզմանը:

Առաջին գիշերն անցկացնելով Ախավանքում, յաջորդ առաւօտեան՝ Յու-
նիսի 29ի ելանք Ախավանքից եւ երկու ժամի չափ փոշոտ ելեւէջներ կտրելով
ուտք դրինք լեռնոտ, բեկբեկուն եւ անտառապատ Կարճկանի գաւառը՝ գեղե-
ցիկ բնութիւն, բայց միանգամայն ամայացած:

Ճանապարհը գնալով դառնում է բնաջնջման ցուցադրական: Ոստանում
կային Շատախի դիմադրութեան շնորհիւ փրկուած աւելի քան 4000 ժողո-
վուրդ, կային փրկուած ժողովուրդ նաեւ Ախավանքում, բայց շատ քիչ թուով,
սակայն Ախավանքից սկսած խօսակցութիւնները դառնում էին բարբա-
րոտութիւնների ու դիակոյտերի շուրջը: Ախավանքում պատմեցին, որ մէկ օր
առաջ ալիքները լճի ափ էին նետել 26 տղամարդկանց դիակներ:

Իսկ Ախավանքից դէպի Կարճկան ճանապարհներին հանդիպում ենք
հետեւեալ տեսարաններին:

Անգեալուր գիւղի տակով ձգուում էր մի ճանապարհ՝ ճանապարհի ըն-
թացքով հոսում է փոքրիկ առուակ, այդ առուակի ափին ընկած է կանացի
դիակ՝ պառկած մէջքի վրայ, ոտները դարձած դէպի արեւելք եւ ձեռքները
կրծքի վրայ, ըստ երեւոյթին անցորդ մէկ հայ մարդ այդ անշունչ դիակին
տուել է քրիստոնէական ծիսակատարութեանը համաձայն դիրք:

Ս. Յակոբի լեռնանցքի արեւմտեան լանջին նորից ճանապարհի կողքին՝
մէկ կնոջ դիակ՝ պառկած մէջքի վրայ, ոտները կուչ արած, թեւերը տարած-
ուած, մագերը խռիւ, դէմքը այլակերպուած, մտածում ենք, թէ որքան տանջ-
ուել է այդ կինը մինչեւ անզգայանալը:

Շեքուդ գիւղի դիմաց մէկ հովտի մէջ գտնուում է կանգնած վիճակում մէկ
ջրաղաց, իսկ դրա կողքին աւերակ խանութ եւ այդ աւերակի յատակին կողք-
կողքի փռուած են երկու դիակներ՝ մէկը կնոջ դիակ է՝ փետացած ձեռքի
ցուցամատը դէպի արեւմուտք դարձրած, կարծէք ցուցամատը ասում է ձեզ,
որ ոճրագործը դէպի այն կողմն է փախել, իսկ միւսը մէկ ամեհի շան դիակ է.

մարդը եւ շունը հաւասարաչափ անուշադրութեան մատնուած, սակայն որպէս արժէք գերադասելի է շան դիակը, չէ՞ որ նրա մորթը կարող է յղփացած մէկի ճարպոտ մարմինը տաքացնել:

Երբ մենք անցնում էինք Կարճկանի գիւղերի կողքով, մէկ ծանր զգացմունք խեղդում էր մեր կոկորդը՝ ամայութիւն ու ամայութիւն, ոչ միայն մարդկային շունչ, ոչ միայն որեւէ արարած չէր նկատուում, այլ նոյնիսկ օդի մէջ թռչուններ անգամ չէին երեւում, մի սոսկալի լռութիւն, խորունկ լռութիւն իջել էր այդ բնութեան վրայ: Եւ մէկէն դատարկ գիւղի ծայրից գազանային ոռնոց բարձրանալով դուրս էին պրծնում ամենի շներ եւ սարսափած փախչում դէպի լեռները եւ անտառները: Դրանք տունալ գիւղի ընտանի շներն էին, որոնք կատարուած ոճիրներին ու սոսկումներին ենթարկուած հայ ժողովրդի երկինք հասնող լաց ու կոծին, աղաղակներին ականատես կրելով [լինելով – Ռ.Ս.], իրենք եւս վայրենացել էին եւ քաղցի մատնուած իջնում էին գիւղերը ուտեստ որոնելու համար: Հայկական սոսկումները ազդել էին շների վրայ անգամ, բայց չէին ազդել թիւրք ոճրագործ պետական գազանների վրայ:

Մեր տեսած կնոջ դիակի կողքին ընկած շունը, անշուշտ ցած իջած, կնոջ դիակը տեսած եւ վրայ պրծած մոմենտին անշուշտ պատահել էին զինուած մարդիկ եւ գնդակահարել այդ կենդանուն:

Այս տպատրոսիւնների մտորումների տակ չափչփում էինք Կարճկանի բեկբեկուն ելեւէջները, թողնելով ետեւներս Գեաւաշի վերջին գիւղը՝ Նանկանցը հրդեհուած:

Իջնում ենք մէկ ծովախորշ. այդտեղ ընկած է Ձէյվա գիւղը եւ շարունակելով ճանապարհը բարձրանում ենք մէկ դիրքատր հարթակ. այստեղ առաջին անգամ հեռուից լսում են թնդանօթային որոտներ, տեղի ունի [են ունենում – Ռ.Ս.] ուժեղ բախում, բարձրանում են ծխի սիւներ, հրդեհում են գիւղերը:

Նորից ելեւէջներ եւ առաջներս բացում է մէկ ընդարձակ խոտաւէտ հովիտ՝ այդ Եղեգիսի դաշտն է, որի հարթակներում գտնուում են Գոմս, Օղուանից բազմամարդ հայաբնակ գիւղերը, իհարկէ բոլորն էլ լքուած ու կողոպտուած: Հովտի մէջ խփում է մէկ վրան, որի տակ պառկած են մի քանի վիրատր զինուորներ, իսկ վրանի կողքին բոցավառում է մէկ ուժեղ խարոյկ. օրը մթնում է՝ որոշում ենք այդտեղ էլ գիշերել:

Բայց աչքերիս քուն չի մօտենում, չնայած սաստիկ յոգնածութեանս: Երկու օրերի տպատրոսիւնը՝ տեսածս դիակները, գիւղերի ամայութիւնները, անունը մարդկային [sic!] եւ կենդանային շների բացակայութիւնը եւ ընտանի շների վայրենացումը եւ առանձնապէս շրջապատի լռութիւնը, ամայութիւնը գալիս անցնում են յիշողութեանս դաշտով եւ ինձ տիրում է պատրանք, երագանք եւ անէութիւն:

Յունիսի 30ն է, առաւօտեան ժամը 6ը, թողնում ենք Եղեգիսի խոտաւէտ հովիտը եւ վիրատր զինուորներին պատսպարող վրանը եւ շարունակում ենք մեր ճանապարհը: Կտրում ենք բաւական տարածութիւն, կատարում ենք մի շարք ելեւէջներ եւ ոտք ենք դնում խոտաւէտ մի տափարակ, դրա զարդն է կազմում մէկ ժայռից բխող սառնորակ աղբիւրը: Այստեղ առաջին անգամ հանդիպում ենք հայ կամատրական մասերին:

Այստեղ է Անդրանիկ⁴⁵ իր գնդով: Նրա տրամադրությունը բարձր է, դեմքը առոյգ: Խօսում է պարզ, անպաճոյճ շեշտով: Մէկ օր առաջ բախուել է թշնամու հետ, ջարդել է տուել ու քշել թշնամուն եւ խլել է 4 թնդանօթ:

Այստեղ է մէկ տարիքատուր՝ Հայկական հարցին նուիրուած անճանաւորութիւն՝ նրան անուանում են Կայծակ Առաքել⁴⁶: Դա պատմում է իր տեսած հետեւեալ տեսարանը:

Եղեգիսից դէպի արեւմուտք գտնում է Կենդրանց հայ գիւղը, 32 տնից բաղկացած, ծառագարդ, ծառապտուղներով հարուստ գիւղ, գիւղի մէջ՝ ջրաղացի մօտ, մէկ ծառի տակ տեսել է 25 կանանց եւ երեխաների գնդակահարուած ու մորթոտուած դիակներ:

Բացի այդ, նոյն Կայծակ Առաքելը [պատմում է, որ], 25 տուն ունեցող Առանց գիւղում, իհարկէ բոլոր գիւղերն էլ դատարկ ու աւեր, տեսել է 5 եւ 7 տարեկան երեխաներ, որոնցից 5 տարեկանը արդէն մեռած, իսկ 7 տարեկանը թէւ կենդանի, բայց բոլորովին հիւծուած, դրան վերցնում է Կայծակ Առաքելը, խնամում է եւ ուտեցնում, բայց փրկել նրա կեանքը չի կարողանում, երեք օրից մեռնում է այդ հիւծուած երեխան:

Շարունակում ենք մեր ճանապարհը, շուտով հասնում ենք Վանիկ հայ գիւղին: Այդ գիւղի տակ, արտերի մէջ, խփուած է մէկ վրան՝ այդտեղ են Վարդանը⁴⁷, Դրօն⁴⁸, Քեռին⁴⁹, Խեչօն⁵⁰, Սիշէն⁵¹ իրենց մասերով [գնդերով – Ռ.Ս.]:

Յերեկուայ ժամը 12ին հրաման է ստացում եւ բոլոր զօրամասերը շարժում են դէպի հիւսիս-արեւմուտք: Ճանապարհը ձգում է լճափերով եւ երկար պտոյտներ գործելուց յետոյ հասնում ենք Խարձիթ հայկական գիւղին եւ կանգ ենք առնում նրա առաջ փռուած դաշտում: Ճանապարհին, նախքան տեղ հասնելը, մէկ փոսի մէջ կուտակուած են 30ի չափ թշնամու դիակներ և այդտեղից ձգուող դաշտի վրայ տեղ-տեղ պատահում են դարձեալ թշնամու կենտ դիակներ: Այս դաշտում երկու օր առաջ տեղի է ունեցել ընդհարում եւ թիրքական զօրքերը դիմել են փախուստի:

Այստեղ հետախոյզները բերում են թիրքական երեք գերիներ՝ խաքի գոյնի հագուստով. դրանք զինուորներ են: Դրանցից մէկը բարձրահասակ, կոպիտ դէմքով, բայց դաժան հայեացքով է. հարցերին չի պատասխանում եւ յամառ լռութիւն է պահում: Միւս երկուսը ընկճուած են, զգում են գերութեան վիճակը եւ պատմում են Բիթլիսում կատարուած ջարդերի ու տեղահանութեան մասին:

Յուլիսի մէկն է, նորից զօրքերի տեղաշարժ, նորից պտոյտներ եւ ելեւէջներ, որոնք յատուկ են Կարճկանի տեղանքին: Ժամը 9 եւ կէսին հասնում ենք Խնձորկէն գիւղին, բայց մինչեւ Պաշուանց հայ գիւղից սկսած ճանապարհին թափուած են փախուստի մատնուած թիրքական բանակի իրերը՝ վրաններ, շարժական մահճակալներ, աթոռներ, նաւթով լի թիթեղատուփեր, դեղերով լի արկղեր եւ այլ իրեր:

Խնձորկէնը գեղեցիկ ծովախորշի ափին բազմած գիւղ է, դիմացը՝ տարածուած պտղատու պարտէզներ, տները լաւ, դպրոցի շէնք եւ այլն, բայց ամայի: Մտնում ենք տները՝ կողոպտուած են, յատակները փորփորած, խուզարկել են բոլոր ծակուծուկերը եւ տարել են ամէն ինչ: Մէկ տանը կից նկատում ենք ծածկուած դուռ. մօտենում ենք, բացում դուռը՝ ներսում մէկ գեղեցիկ

երինջ մեզ տեսնելով վախի շարժումներ է կատարում եւ եթէ մենք կանգնած չլինէինք դռան շէնքի վրայ, անշուշտ նա դուրս կը թռչէր, փախուստի դիմելով:

Այդ երինջը, որը մի գեղեցկութիւն էր, այնպիսի գեղեցկութիւն, որ լաւ նկարիչը նրանից կը կերտէր ուշագրաւ մի կտաւ, հայեացքը բեւեռել էր մեզ վրայ ու սպասում էր: Այդ հայեացքը թախանձող էր, ներգործող ու հմայող. նա արտայայտում էր սարսափ եւ կարեկցութիւն եւ աղերսանք, միայն բանական մարդը չէ, որ աղէտը դրոշմած իր ճակատին կարեկցութիւն է աղերսում ձեզանից եւ աղերսում է ոչ թէ բառերով կամ խօսքով, այլ իր տեսքով–արտայայտութեամբ: Նման պայմաններում մարդու հետ ապրող կենդանին ամմա սչի մնում մասսայական աղէտը տեսնելու[ց], զգալու[ց] եւ արտայայտելու[ց]: Եւ այդ մոմենտին աւերակ ու ամայացած գիւղում միայնակ մնացած այդ կենդանու գեղեցիկ աչքերի ու հայեացքի մէջ եւ կարողացի եւ սարսափ եւ կարեկցութիւն եւ աղերսանք:

Երկար դիտելուց յետոյ դուռը նորից ծածկեցինք ամայի գիւղում միակ կենդանի մնացած այդ կենդանու վրայ եւ հեռացանք տանելով յիշողութեանս մէջ դրոշմուած այդ կենդանու եւ սարսափ եւ կարեկցութիւն եւ աղերսանք արտայայտող հայեացքը, միաժամանակ տանելով խղճիս վրայ նստած մի անասելի ծանրութիւն, այն, որ տեսնելով այդ կարեկցութիւնն ու աղերսանքը, անկարող ես վերացնել, անգամ մեղմացնել այն:

Վանի լճի հարաւ-արեւմտեան ծայրի ուղղութեամբ ձգում է նեղ ու ժայռոտ մէկ ձոր: Այդ ձորի միջով գալիս թափում է լճի մէջ մէկ գետ՝ դա կոչում է Թուխ: Այդ ձորը, միաժամանակ Թուխ գետը հանդիսանում են Վանի եւ Բիթլիսի վիլայէթների սահմանը: Բացի այդ, լճից ոչ հեռու, Թուխ գետի ձախ ափին գտնուում է Թուխ գիւղը մէկ փոքրիկ հարթակի վրայ գետեղում:

Ժամի 2ն է, Անդրանիկն իր գօրամասով եւ 2 լեռնային թնդանօթներով կանգ է առել Թուխ գետի ձորի արեւելեան մէկ բարձրաւանդակի վրայ, որտեղից երեւում է Թուխ գիւղը եւ լճի արեւմտեան ափերի ուղղութեամբ ընկած Ուրթափ գիւղը եւ դրա ետեւում երկարուկ ձգուած բլուրների շարքը: Թշնամին բռնած ունի Ուրթափը եւ բլուրների շարքը:

Անդրանիկի մօտ ենք մենք՝ Վանից եկողներս: Որոշում ենք իջնել ձորը եւ անցնել գետի միւս ափը եւ այցելել Թուխ գիւղը:

Իջնում ենք ձորը, կոխում ենք գետը ու անցնում: Գետը մեծ չէ, բայց փոքր ինչ փռուած է, ծանծաղուտ եւ քարոտ: Գետի այն լայնութեան այն ընթացքի մէջ, որով մենք անցանք, քարերին եւ ջրաբոյսերին դէմ առած եւ համբրեցի 7 տղամարդկանց միանգամայն մերկ դիակներ, որոնք ջրի հոսանքից ողողուած ներկայացնում էին ձիւնի կատարեալ սպիտակութիւն: Դրանք Թուխ գիւղի հայ տղամարդկանց դիակներն էին: Այդքան էին մի փոքր տարածութեան վրայ իմ տեսածը: Որքան էին մեր անցած տեղից վեր եւ վար հոսանքներում ընկածները՝ աստուած գիտէ. թիւրքական եաթաղանը զարկել ու անցել էր անխնայ:

Թողինք այդ տեսարանը եւ բարձրացանք այն հարթակի վրայ, ուր գետեղում էր Թուխ գիւղը. շնչաւոր էակ չի երեւում, կատարեալ լռութիւն է, այս ու այնտեղ հարթակի վրայ, տների առաջ թափթփուած են տնային իրեր՝ բուրդ, մանածներ, թաղիքներ, անկողիններ, իւղ, պանիր եւ այլն, իսկ հարթակի կենտրոնում կանգնած է մի սայլ՝ նման իրերով բարձուած, որքան որ հնարաւոր է եղել: Որչափ մարդկային աշխատանք է թափուել նրանց վրայ, քա-

նի-քանի ընտանիքներ ու շնչեր ստեղծել են այդ բոլորը եւ մէկ ատերիչ ձեռք եկել, ատերել է ու գնացել:

Մինչդէռ այս ու այն կողմ էին[ք] նայում, յանկարծ դիմացի մէկ փոս ընկած դռնից դուրս եկաւ մէկ պառաւ կին, գլուխը բաց, մազերը խռիւ, դէմքը այլալուծ, հագուստը մաշուած ու կեղտոտ. դուրս եկաւ, արտասովոր հայեացքը ձգեց այս ու այն կողմը եւ կարծէք որեւէ մէկին փնտռում էր եւ երբ մեզ տեսաւ, մէկէն երեսը դարձրեց եւ շտապ ներս մտաւ: Մենք ձայն տուինք, հայերէն կանչեցինք ետեւից՝ մի վախեցիր, արի, կրկնեցինք, բայց գուր, նա չլսեց եւ եթէ լսեց էլ, ետ չեկաւ ու անյայտացաւ մթութեան մէջ: Որպիսի՜ աղէտներ էր տեսել ու ապրել նա՜ տղաներ, հարսներ, թոռներ ի՞նչ էին եղել, ո՞ր էին տարուել, թերեւս գնդակահարուել ու խողխողուել էին նրա աչքերի առաջ: Նրա մէկէն յայտնուելը, նրա արտասովոր որոնող հայեացքը եւ մէկէն անյայտանալը ոչ մի կասկած չթողին ինձ մէջ, որ այդ կինը խելագարուել էր՝ անկարող լինելով տանել իր սիրելիների խողխողումները:

Մինչդէռ մեր խօսակցութիւնը դառնում էր այդ թշուառ էակի անճանալութեան շուրջը, մեր ականջին հասան մեր հետախոյզների զգուշացումը թշնամու մօտիկութեան մասին եւ [մենք] շտապ թողինք ամայի գիւղը, իջանք ցած, կոխեցինք գետն ու անցանք եւ բռնեցինք վերելքը: Երկրորդ անգամ ես համբարեցի գետում տեսածս 7 մերկ սպիտակ դիակները:

Օրը մթնում էր, Անդրանիկը հեռադիտակն աչքերին՝ դիտում էր շրջակայքը: Ուրթափի ետեւում ընկած բլուրների շղթայի բարձունքներում նկատեց թշնամու շարժումներ՝ Անդրանիկը հրաման տուեց առաջ քաշել մէկ թնդանօթը: Թնդանօթաձիգ սպան թնդանօթի բերանը ուղղեց դէպի մատնանշած կէտը եւ փականը շարժեց՝ ռումբը սուրաց եւ ընկաւ բլուրների շղթայի այս կողմը եւ հողի սիւն բարձրացրեց: Թնդանօթը դրոտաց երկու անգամ եւս եւ այս անգամ ռումբերն ընկան բլուրների շղթայի բարձրունքների վրայ: Մի փոքր անց շղթայի ամբողջ երկարութեամբ սկսուեց[ին] հրացանային համազարկեր: Այս տեսեց մի քանի թռչել եւ դադարեց:

Մութը կոխել էր արդէն, այս մեր շրջագայութեան վերջին կէտն էր. թողինք բարձունքը, իջանք Խնձորկէնին մերձ մէկ խոտաւետ տեղ ու այստեղ էլ զիչերեցինք:

Յուլիսի 26 է, վերադառնում ենք Վան: Ճանապարհը ձգում է կամաւորական մասերի հանգիստ առած տեղերով:

Երեկոյեան ժամը 76 է, կանգ ենք առնում Չոլու գիւղի մօտիկ մէկ խոտաւետ հովտում: Այդտեղ գտնուում են Դրոյի եւ Համազասպի⁵² մասերը: Որոշում ենք այդտեղ զիչերել:

Ընկերներս առանձնացել են մասերի ղեկավարների հետ խորհրդակցութեան: Ես դանդաղ քայլերով շրջում եմ հանգիստ առած զինուորների շարքերով եւ դիտում նրանց ճակատային կենցաղը. հետաքրքիր է այդ, ամէն տեղ խարոյկներ ու խարոյկներ: Որպէս վառելիք հայթայթում են ամայացած զիւղեր[ի]՝ տների ծածկերը եւ դուռ ու լուսամուտները: Խարոյկների վրայ եփում են թիթեղեայ թէյնիկները, զինուորական փոքրիկ կաթսաներով միս, հաճառ եւ այլ ընդեղէններ եւ խարոյկների շուրջը աշխոյժ գրոյցներ, երգեր եւ երբեմն էլ պարեր եւ այլն: Եւ մինչդէռ ես շարունակելով [ուսումնասիրել] այդ առանձնայատուկ կենցաղը, փոխում էի քայլերս, ականջիս են հասնում խօսակցութիւն սարից նոր իջած ինչ որ փախստական հայ ընտանիքի մա-

սին: Հետաքրքրում է ինձ այդ խօսակցութիւնը, փնտռում եւ գտնում եմ այդ ընտանիքը, առաջ եմ քաշում եւ նստեցնում եմ մէկ զինուորական խարոյկի առաջ այնպէս, որ խարոյկի բոցը լուսատրում է նրանց դէմքերը եւ բացում նրանց հետ իմ սովորական զրոյցը, որից եւ պարզում է հետեւեալը:

Իմ դիմաց նստած են երեք փրկուած հոգիներ.

1. Բարձրահասակ հայ կնոջ տիպար, 45 տարեկան, անունը Սիմէ

2. Նուազ կազմուածքով աղջիկ՝ 8 տարեկան, անունը Գոզէ

3. Շէկատուն մազերով երիտասարդ, 20 տարեկան, անունը Գաբրիէլ

Բոլորն էլ գունատ եւ հիւծուած դէմքերով՝ զրկանքներ, քաղց, վախ, սարսափներ ապրած:

Սիմէն եւ Գոզէն մայր ու աղջիկ են, իսկ Գաբրիէլը Սիմէի տեքոր տղան է:

Ապրիլի 6-7ին տեղի է ունեցել Կարճկանի կոտորածը: Սիմէն վերցրած իր աղջիկը փախել է հեռաւոր Բիկրանց քրդաբնակ գիւղը, 3 ամսի չափ կարողացել է իր եւ իր աղջկան կեանքը փրկել եւ լսելով ռուսական բանակի գալը բռնել է աղջկայ ձեռքը եւ ցած է իջել իր[են] պատսպարած գիւղից եւ բանակին հասնելով անսպասելի պատահել է իր տեքոր տղային, որը զօրահաւաքի կապակցութեամբ բանակ է տարուել եւ բանակից փախչելով կարողացել է անխուսափելի կառափնարանից ազատուել:

Այս ընտանիքը Վանիկ գիւղի բնակիչ է: Վանիկն ունէր 15 տուն հայ բնակիչ: Սիմէն եւ Գաբրիէլը նախ տալիս են այդ 15 տան անունները, որը գրի են առնում իմ ծոցատետրում եւ ապա անուն [առ] անուն տալիս են այդ 15 ընտանիքից երեքի կազմը, որոնք նոյն ընտանիքի երեք բաժանուած եղբայրների ընտանիքներն են:

Այդ երեք եղբայրներն էին՝ Յակոբը, Աւետիսը եւ Սահակը: Դրանք այս աշխարհը թողել էին բնական մահով նախքան ներկայ դաժան կոտորածները:

Յակոբի ընտանիքը բաղկացած էր հետեւեալ 7 հոգուց.

1. Յակոբի կինը՝ Խերօն՝ 50 տարեկան

2. Մեծ տղան Մանուկը՝ 30 -,-

3. Երկրորդ տղան Դաւիթը՝ 27 -,-

4. Մանուկի կինը՝ Նունուշը՝ 26 -,-

5. -,- տղան՝ Բաղալը՝ 10 -,-

6. -,- աղջիկը՝ Մարօն՝ 8 -,-

7. -,- երկրորդ աղջիկը՝ Կտէ՝ 6 -,-

Աւետիսի ընտանիքը բաղկացած էր հետեւեալ 7 հոգուց.

1. Աւետիսի կինը՝ Սիմէ՝ 45 տարեկան

2. ,, ա տղան՝ Մուրադը՝ 22 -,-

3. ,, բ -,- Միսակը՝ 19 -,-

4. ,, գ -,- Սահակը՝ 16 -,-

5. ,, դ -,- Կրպօն՝ 12 -,-

6. ,, ե -,- Սիմոնը՝ 10 -,-

7. ,, աղջիկը՝ Գոզէն՝ 8 -,-

Բացի այս 7ը, երկու աղջիկներն էլ ամուսնացել գնացել էին: Մուրադը վաղուց պանդխտել էր եւ գտնում էր Եալթայում⁵³, Սիմէն եւ Գոզէն ինձ հետ զրուցող մայր ու աղջիկն էին:

Սահակի ընտանիքը բաղկացած էր հետեւեալ 3 հոգուց.

1. Սահակի կինը՝ Անգինը՝ 40 տարեկան
2. ,, - տղան՝ Գաբրիելը՝ 20 տարեկան
3. Գաբրիելի կինը՝ Լուսիկը՝ 18 -,-,-
4. Գաբրիելին ինձ հետ գրուցողն էր:

Այս երեք ընտանիքները բաղկացած էին 17 հոգուց: Դրանցից մեկը գրտնուում էր օտարութեան մէջ՝ մնացեալ 16 հոգուց 3ը ներկայներն էին, իսկ 13ը չկային:

Այդ 13 հոգուց՝

4ը տղամարդ էին, որոնք անշուշտ խողխողուել էին թիրքական կառաւարաններում:

4ը կանայք, որոնք կամ առեւանգուել են կամ բոցերի մէջ այրուել ու փոշիացել:

Իսկ 5 մանուկ հասակի տղաներ եւ աղջիկներ, որոնք եթէ զոհ չէին գնացել սուրող յորդանների սմբակների տակ, ապա վաճառուել ու տարուել են իսլամի հետետողների թիւն աւելացնելու համար:

Կառաւարան, առեւանգում, շուկայ հանուած, իսլամացում, հրդեհային բաղնիքներ եւ յորդանների սմբակների տակ փոշիացում, ահա մէկ միլիոն թիրքահայութեան գողգոթան⁵⁴:

Մէկ ամբողջ ցեղի արիւնը աճուրդի տրուեց, աճուրդի տրուեց մեծ պետութիւնների կողմից, զագիր-վամայիր դիպլոմատիայի կողմից, բարբարոս թիրք պետութեան հողային եւ շուկային պատառիկներ կորզելու համար, աճուրդ կատարուեց, մէկ ամբողջ երկրամաս ամայացաւ:

Տցում է յիշողութեանս մէջ մէկ աղետալի անցք. անցք, որ տեղի ունեցաւ 1912 թուին: Ամերիկեան մէկ խոշոր նաւ, որ կրում էր «Տիտանիկ» անունը, իր մէջ ընդունելով 3000 ուղեւորներ՝ դուրս եկաւ ծով, ուղղութիւն վերցնելով դէպի եւրոպական նաւահանգիստները: Այդ նաւը ճանապարհի կեսին մէկէն խորտակուեց, իր հետ տանելով 3000 ուղեւորներին⁵⁵:

Այս աղետը իր ժամանակին այնպիսի յուզմունք առաջ բերեց ամբողջ աշխարհի մամուլի էջերում եւ հասարակական խաւերում, որ շաբաթներ շարունակ լոյս էին տեսնում աղետի վերաբերեալ մանրամասնութիւններ եւ յուզում հասարակական միտքը:

Պատահել էր տարերային աղէտ, բազմաթիւ մարդիկ զոհ էին գնացել այդ աղետին, մարդկային չարագործ ձեռքը մասնակից չէր այդ աղետին: Բայց եւ այնպէս յուզմունքը մեծ էր եւ իրաքանչիւր բերան աղաղակում էր գտնել մեղաւորներին եւ գնդակահարել նրանց:

Թուրքիայի հայութիւնը ոչ միայն հազար, ոչ միայն 3 տասնեակհազար եւ ոչ միայն 3 հարիւր հազար, այլեւ դրանից էլ 3 անգամ աւելի բազմութիւն զոհ գնաց մարդկային պատմութեան դաժան [այլ] եւս կնիքը դրոշմուած՝ բարբարոս թիրք պետութեան չարամիտ ոճրագործ, դաւադիր գործողութիւններին:

Ելլովում⁵⁶ բազմած Ժէօն ճիւղների ոճրագործ կառավարութեան գաղտնի հրամանը տեղեր հասաւ թէ չէ, հրապարակ նետուեցին բարբարոս յորդանները, սկսուեցին տղամարդկանց զանգուածային ջարդեր, կանանց ու թերատի աղջիկների առեւանգումներ ու բռնաբարութիւններ, որոշ տեղերում լցրեցին տների ու գոմերի մէջ կին, երեխաներ հարիւրներով եւ դժոխային խարոյկների մէջ մոխիր դարձրին եւ ապա կենդանի մնացած հարիւր հազարատր կին, աղջիկ, երեխայ քարաւան-քարաւան քշեցին դէպի Միջագետ-

քի աւագուտները, որի ճանապարհը հանդիսացաւ սոսկումների, հիւծուածների եւ կմախքացածների ընդհանուր գերեզման եւ միաժամանակ Դէր-Ջօրի մի քանի կենտրոնների շուկաները արտասովոր աշխուժութիւն ստացան գերի տարուած հայ մանուկների աճուրդի շնորհիւ:

Եւ այս բոլորը կատարուեց բացայայտ, այս բոլորը տեսաւ դիւանագիտական-դիպլոմատիկական աշխարհը, բայց թէ դիւանագիտական աշխարհը կոյր ձեւացաւ, խուլ ձեւացաւ, որովհետեւ այդ Դանթէան դժոխքը հարկաւոր էր նրան՝ նրան հարկաւոր էր շուկայ, շահոյթ, շահագործում:

Այստեղ վերջակէտ ենք դնում: Ամէն ինչ ասուեց:

ԾԱՆՕԹԱԳՐՈՒԹԻՒՆՆԵՐ

- ¹ Այս մասին աւելի մանրամասն տես՝ Ռ. Օ. Սահակեան, *Արեւմտահայութեան Յեղափոխականութիւնը Եւ Ինքնապաշտպանական Կռիւները 1915 Թուականին*, Երեւան, «Գիտութիւն» Հրատ., 2005:
- ² *Վարազդատ Տերոյեան, Գիտական Եւ Հրապարակախօսական Աշխատութիւններ*, առաջ. եւ ծանօթ.՝ Ռ. Օ. Սահակեան, Հրատարակութեան պատրաստեց Ն. Վ. Դերոյեան, Երեւան, Պատմութեան Ինստիտուտ, 2006, էջ 93:
- ³ Հայաստանի Պատմութեան Թանգարանի Նոր Եւ Նորագոյն Բաժնի Պատմութեան Ֆոնդ, Ա-Դոյի ֆոնդ, գ. 839/195 (դ), ք. 30:
- ⁴ Կարօ Սասունի, *Թրքահայաստանը Ա. Աշխարհամարտի Ընթացքին (1914-1918). Թրքահայոց Գաղթաշարժերը Եւ Անոնց Դերը՝ Հայաստանի Հանրապետութեան Կազմութեան Աէջ*, Sevan Printing House, Պէյրութ, 1966, էջ 81: Վանի նահանգապետութեան մասին աւելի մանրամասն տես՝ Ա. Դ. Օ, *Մեծ Դէպքերը Վասպուրականում 1914-1915 Թուականներին*, Երեւան, Տպարան «Լոյս», 1917. նաեւ՝ Ա. Ասրեան, «Վանի Նահանգապետութեան Եւ Ռուսական Կովկասեան Բանակի Հրամանատարութեան Տեսակէտները Նահանգապետութեան Տարածքում Քրդերի Վերաբնակեցման Մասին», *Բանբեր Հայաստանի Արխիւների*, N 1-2, 2007, էջ 31-36. նաեւ՝ նոյնի՝ *Արամ Մանուկեան. Կեանքը Եւ Գործը (Ազատագրական Շարժման Եւ Անկախ Պետականութեան Վերականգնման Ուղիներում)*, Երեւան, «Լուսակն» Հրատ., 2008. նաեւ՝ Ռուբէն Սահակեան, *Հայկական Ոստիկանութեան Կազմակերպումը Եւ Գործունէութիւնը Վանի Նահանգապետութեան Շրջանում (1915 թ. Մայիսի 8-Յուլիսի 17)*, Երեւան, ՀՀ ԳԱԱ Պատմութեան Ինստիտուտ 2008. նաեւ՝ *Արամ Մանուկեան: Փաստաթղթերի Եւ Նիւթերի Ժողովածու*, գլխ. խմբ. եւ կազմ.՝ Ա. Վիրաբեան, կազմողներ՝ Գ. Աւագեան, Մ. Աւետիսեան, առաջաբանի հեղինակ՝ Ա. Ասրեան, Երեւան, Հայաստանի Ազգային Արխիւ, 2009. նաեւ՝ Ռուբէն Սահակեան, «Արամ Մանուկեանը Վանի Նահանգապետ», *Արամ Մանուկեան. Ազգային Եւ Պետական Գործիչը (Յօդուածների Ժողովածու)*, Երեւան Պատմութեան Ինստիտուտ, 2010, էջ 25-51. նաեւ՝ Ա. Հ. Յարութիւնեան, «Վանի Նահանգապետութեան Պարենային Քաղաքականութիւնը (1915 թ. Մայիս-Յուլիս)», *Էջմիածին*, Դ., 2010, էջ 56-61:
- ⁵ Նա 1915 Մայիսի 16ին հրաժարում է այդ պաշտօնից, պատճառաբանելով, որ իր կրթական ցենզն աւելի բարձր է քան նախագահ Խաչիկ Չենոբեանինը (*Արամ Մանուկեան: Փաստաթղթերի Եւ...*, էջ 77-78):
- ⁶ Տերոյան, *Գիտական Եւ Հրապարակախօսական*, էջ 326-328:
- ⁷ Ամերիկացի միսիոներ Քլերընս Աշլըրի յուշերի համաձայն, քրդական ցեղերի մեծ մասն արագօրէն ընդունել էին ռուսական հպատակութիւն, սակայն յարմար պահը չէին կորցնում հայերի վրայ յարձակուելու համար (Clarence D. Usher, Grace H. Knapp, *An American Physician in Turkey. A Narrative of Adventures in Peace and War*, Houghton Mifflin Company, Boston, N.Y., 1917, էջ 288):

⁸ ՀԱԱ, ֆ. 28, ց. 1, գ. 132, ք. 47:

⁹ Նոյն, ֆ. 50, ց. 1, գ. 13, ք. 22:

¹⁰ Բաքուի հայութիւնը Վան է ուղարկում բժշկական խումբ՝ բժիշկ Թաշնեանի գլխավորութեամբ: Խումբը մինչեւ Վան ժամանելը գործում էր Վաղարշապատի շրջանում եւ բժշկական օգնութիւն էր ցոյց տալիս գաղթականութեանը (ՀԱԱ, ֆ. 28, ց. 1, գ. 384, ք. 115):

¹¹ *Մշակ*, Թիֆլիս, N 142, 3 Յուլիսի 1915. նաեւ՝ ՀԱԱ, ֆ. 27, ց. 1, գ. 245, ք. 17 եւ շրջ.:

¹² Այսինքն Բուժակներ:

¹³ *Հորիզոն*, Թիֆլիս, N 127, 10 Յունիսի 1915:

¹⁴ ՀԱԱ, ֆ. 239, ց. 1, գ. 1, ք. 26: Թուրք եւ քուրդ քաղաքացիական բնակչութիւնը գտնում էր ռուս նշանատր գրող Լեւ Տոլստոյի դստեր՝ Ալեքսանդրայի հովանաւորութեան ներքոյ: Կոմսուհին կամատր ծառայում էր Վանում տեղակայուած Համառուսաստանեան Քաղաքների Միութեան Կարմիր Խաչի լազարէթում (Usher, Knapp, էջ 292-293. նաեւ՝ ՀԱԱ, ֆ. 239, ց. 1, գ. 1, ք. 26): Աւելին, Վանի նահանգապետութիւնը նաեւ իր վրայ է վերցնում միսիոներների մօտ ապաստանած բրքուհիների սննդի մի մասի հոգածութիւնը: Հայաստանի Ազգային Արխիւում պահպանուել է ամերիկեան միսիոներներ Աշքրի եւ Էռնեստ Եարուուի Յունիսի 8ին գրուած նամակը, ուր նրանք խնդրում էին Արամին՝ պարէնով ապահովել իրենց հաստատութիւններում գտնուող բուրբ եւ քուրդ կանանց ու երեխաներին: Նրանց կարիքների համար տրամադրում է տաս ոչխար (ՀԱԱ, ֆ. 242, ց. 1, գ. 9, ք. 13):

¹⁵ *Վան-Տոսպ*, Թիֆլիս, N 30, 19 Յունիսի 1916, էջ 14:

¹⁶ Սահակեան, *Հայկական Ոստիկանութեան Կազմակերպումը*, էջ 37, 46-50, 53, 66:

¹⁷ Այս մասին աւելի մանրամասն տե՛ս մեր գրախօսականը՝ *Բանքեր Հայաստանի Արխիւների*, քիւ 2, 2004, էջ 187-203, Alexandra Barkhturina, *Okraini Rossiyskoi Imperii: Gosudarstvennoe Upravleniye I Natsionalnaya Politika V Godi Pervoy Mirovoy Voyni (1914-1917gg.)* (Ռուսական Կայսրութեան ծայրամասերը. պետական կառավարումը եւ ազգային քաղաքականութիւնը Առաջին Համաշխարհային Պատերազմի տարիներին (1914-1918 թթ.), Մոսկուա, Բոսպէն, 2004, էջ 208-222. <http://www.armarchives.am/UserFiles/File/02-04.pdf>

¹⁸ Կովկասեան Բ. հրաձգային բրիգադի հրամանատար գեներալ Թովմաս Նազարբէկեանն իր յուշերում անդրադարձել է այդ «զերակշիռ» ուժերի յարձակմանը: Նա յուշագրում է. «Ջոկատի շտաբ կապի համար գործուղուել էր *Լաբինսկեան կազմակալին*՝ *գնդի խորունժրի (ազգանունը չեմ յիշում)*: Նա յետագայում իմ շտաբի սպաներին պատմել է, երբ Մուշի դաշտից Յուլիսի 9ին *Լաբինսկեան Գնդի հրամանատարն ինձ համար գեկուցադիր էր պատրաստում՝ դիմեց սպաներին եւ ասաց, որ պէտք է հարկադրել գեներալ Նազարբէկովին նահանջել: Հարցրեց, թէ որքան թռչուն կայ ծառի վրայ: Ինչ որ մէկը հաշուեց եւ ասաց՝ 12: Դէ այդպէս էլ գեկուցէք, որ Մշոյ դաշտից յարձակուում են 12 թաբուրներ (գումարտակներ - Ռ.Ս.)» (ՀԱԱ, ֆ. 45, ց. 1, գ. 3, ք. 48 շրջ.-49):*

Թուրքական զօրքի նման թուաքանակը, որը ընկել էր վերը նշուած հրամանատարի կեղծ գեկուցագրի հիմքում, առ այսօր օգտագործում է ռուսական պատմագրութեան մէջ՝ որպէս արդարացում 1915 Յուլիսի 11ի նահանջի:

¹⁹ ՀԱԱ, ֆ. 1457, ց. 2, գ. 28, ք. 16 շրջ.:

²⁰ Ա.Դ-օ, *Մակեդոնիա*, Ս. Պետերբուրգ, «Պուշկինեան Արագատիպ» Հայկական Տպարան, 1903:

²¹ Նոյն, էջ 12-13:

²² Ա.Դ-օ, *Հայրենիքի Կարօտը*, Ս. Պետերբուրգ, «Պուշկինեան Տպարան», 1905, էջ 7:

²³ Ա.Դ-օ, *Միքայէլ Նալբանդեանի Կեանքի Հետաքրքիր Մի Էջ Եւ Բակումինի Նրան Գրած Նամակները*, Երեւան, Տպարան «Լոյս» Արշակ Յակովբեանցի եւ որդիք, 1908:

- ²⁴ Ա.-Ռ.օ, *Հայ-Թուրքական Ընդհարումը Կովկասում (1905-1906 թ.)*. (Փաստական, Վիճակագրական, Տեղագրական Լուսարանություններով), Երևան, Տպարան Այվազեանց եւ Նազարեանց, 1907:
- ²⁵ Ա.-Ռ.օ, *Վանի, Բիթլիսի եւ Էրզրումի Վիլայեթները*, Երևան, Տպարան «Կուլտուրա», 1912: «Յուշեր Տաճկահայաստանի ճանապարհորդությունից» յոդամաշարը տպագրում է *Նոր Հոսանք* թերթում (1913-1914ին), սակայն թերթի փակման պատճառով մնում է անարտատ: Գիտնականի արխիվում պահպանում են մի շարք անտիպ ուսումնասիրություններ՝ «Հայութեան Երկունքը», 899 մեքենագիր էջ: Այն հիմնականում նուիրում է 1918ի Մայիսեան հերոսամարտերին եւ Հայաստանի Հանրապետութեան ստեղծմանը, «Ռուսական Յարերը Եւ Հայկական Հարցը», «Իմ Յուշերը» եւն.: Նշումներից առաջին երկուսը ՀՀ ԳԱԱ Պատմութեան Ինստիտուտը պատրաստում է հրատարակութեան:
- ²⁶ Ա.-Ռ.օ, *Ազատագրական Շարժումը Ռուսաստանում Իր Ծագման Առաջին Օրերից*, Երևան, Տպարան «Լոյս» Արշակ Յակովբեանցի եւ որդիք, 1908:
- ²⁷ *Հովիտ*, Թիֆլիս, N 39, 11 Հոկտեմբերի 1915, էջ 609: Տե՛ս՝ Ա.-Ռ.օ, *Մեծ Դեպքերը Վասպուրականում 1914-1915 Թուականներին*, Երևան, Տպարան «Լոյս», 1917:
- ²⁸ ԺԹ. դարի ընթացքում Ռուսաստանը մի քանի անգամ պատերազմել է Թուրքիայի դեմ՝ 1806-1812, 1828-1829, 1853-1856 եւ 1877-1878 թուականներին:
- ²⁹ Նկատի ունի երիտթուրքական Սիւրիւն Եւ Առաջադիմութիւն (İttihat Ve Terakki) Կուսակցութեանը, որին նաեւ կոչում էին Ժէօն (թուրքերէն՝ Jöntürkler- երիտասարդ) Թուրքեր: Երիտթուրքական այս կուսակցութիւնը հիմնուել է 1889ին: 1908ին երիտթուրքերը գահընկեց արեցին սուլթան Աբդուլ Համիդ Բ.ին եւ հռչակեցին Օսմանեան Թուրքիայում սահմանադրութեան վերականգնումը: Առաջին Համաշխարհային Պատերազմի տարիներին՝ 1914-1918, երիտթուրքերը ծրագրեցին եւ իրականացրին օսմանահպատակ հայերի ցեղասպանութիւնը, որին զոհ գնացին 1,5 միլիոն հայեր: 1919-1920ին Կ. Պոլսում տեղի ունեցած դատավարութեան ժամանակ երիտթուրքերի պարագլուխները դատապարտուեցին հեռակայ մահապատժի:
- ³⁰ Աբդուլ Համիդ Բ. (1842-1918)՝ Օսմանեան Կայսրութեան սուլթան (1876-1909), յայտնի է նաեւ «Կարմիր սուլթան» անունով՝ հայերի եւ այլ քրիստոնէայ ժողովուրդների նկատմամբ զանգուածային կոտորածներ կազմակերպելու համար: 1894-1896՝ նրա դրդմամբ Թուրքիայում տեղի ունեցան հայերի կոտորածներ, որին զոհ գնացին 300 հազար հայեր:
- ³¹ Երիտթուրքերը պատերազմի նախօրեակին բանտերից ազատ արձակեցին քրեական յանցագործներին, որոնցից կազմուեց *Թեշքիլաթը Մահումէն* (յատուկ կազմակերպությունը): Նրանցից կազմուած ջոկատներն օգտագործուեցին հայերին կոտորելու համար: Կազմակերպութիւնում ընդգրկուել են մօտ 40 հազար հոգի:
- ³² Դէյր էլ Զօր, անապատային քաղաք Միլիայում, Եփրատի աջ ափին: 1914-1918 այնտեղ եւ նրա շրջակայքն աքտորուեցին հայերը, որտեղ նրանք ենթարկուեցին ոչ միայն դանդաղ եւ տառապալից սովամահութեան, այլեւ թուրքերի յարձակումներին: Շրջակայ արաբ բնակչութիւնը զգալի օգնութիւն ցուցաբերեց տարագիրներին եւ որով թուով հայեր փրկուեցին շնորհիւ այդ օգնութեան:
- ³³ Աքտրական հայերը Դամասկոսի եւ հարաւային այլ քաղաքներում վաճառուեցին բացառապէս մահմեդականներին:
- ³⁴ Վանը կազմուած էր երկու թաղամասերից՝ Այգեստանից (23,000 հայ) եւ Քաղաքամէջից (2,300 հայ): Վերջինս համարում էր քաղաքի գործարար կենտրոնը: Այստեղ էին գտնուում շուկան, խանութները, պահեստները, արհեստանոցները եւն.: Բնակչութիւնը հիմնականում բնակուում էր Այգեստանում: Երկու թաղամասերի միջեւ գտնուում էր թուրքական թաղամասը (18,000 հոգի): 1915 Ապրիլի 7ից մինչեւ Մայիսի 4ը երկու թաղամասերը ինքնապաշտպանական մարտեր մղեցին թուրքական կանոնադր զօրքի եւ քրդական ջոկատների դէմ: Շնորհիւ դիմադրութեան եւ

ռուսական Բայազետի Ջոկատի, որի կազմում էր Հայկական Կամավորական Արարատեան (Ե.) գունդը, Վանը եւ նահանգի բնակչութեան զգալի մասը փրկուեց կոտորածից:

Ռուսական բանակի Վան շարժուելու նախաձեռնութիւնը պատկանում էր հայ կամավորներին, քանի որ ռուսական հրամանատարութիւնը նպատակ չունէր Վանը գրաւել: Այդ մասին ատէլի մանրամասն տե՛ս՝ David Martirosian, “Vanskaya Operatsia – Epizodei Armyanskoy I Ruskoy Istori” (*Վանի գործողութիւնը՝ հայկական եւ ռուսական պատմութեան դրուագներ*), (<http://www.regnum.ru/news/1161786.html>): Ռուսաստանցի հայազգի պատմաբանը մերժելով թուրքական թիւր տեսակէտը, թէ իբր Վանում հայերն ապստամբել են, որպէսզի օգնեն ռուսներին, ռուսական արխիւներից բերած համապատասխան փաստաթղթերով ապացուցում է, որ Կովկասեան բանակն իր առջեւ նպատակ չէր դրել գրաւել Վանը: Ռուսները Վան տանող ճանապարհի վրայ յայտնուում են պատահաբար, երբ հետապնդում էին Դիլիմանի ճակատամարտում պարտութիւն կրած Խալիլ բէյի զօրամիաւորին, որը փախչում էր Վանի ուղղութեամբ: Խալիլը ցանկանում էր միանալ Վանը պաշարած իրայիններին եւ վերջ տալ հայերի ինքնապաշտպանութեանը: Վկայակոչուած փաստաթղթերով եւ դրանց հիման վրայ կատարած եզրակացութիւններով Մարտիրոսեանը հերքում է խորհրդահայ այն պատմաբանների տեսակէտը, թէ ռուսական զօրքն է ազատագրել Վանը: Այդ մասին կարեւոր տեղեկութիւններ են պահպանուել Արարատեան Գնդի հրամանատար Վարդանի (Մարգիս Մեհրաբեան) անտիպ յուշերում: Նա վկայում է, որ Արարատեան Գունդը, հակառակ Բայազետի Ջոկատի հրամանատար զօրավար Ա. Նիկոլաեի, որոշում է յառաջանալ եւ օգնել Վանի պաշտպաններին: Վարդանը վկայում է, որ գնդերի հրամանատարներ Դրօն (Դրաստամատ Կանայեան), Համազասպը (Մրուանձտեան) եւ Քեռիւն (Արշակ Գաւաֆեան) միակամ էին: Վարդանը ներկայանում է զօրավար Նիկոլաեիին եւ յայտնում իրենց որոշման մասին, ասելով. «*Ձերդ Մեծութիւն: Մենք գնում ենք առաջ: Հայ ժողովուրդը ուռւաց գէնքի, ուժի կարիքը մինչեւ այժմ այնքան չի զգացել, ինչպէս ներկային: Մի օր շուտ կը հասնենք Վան՝ կը փրկենք ժողովրդին, մի օր ուշ կը հասնենք՝ կոտորուած ժողովրդին կը թաղենք: Մենք առաջ գնալով՝ հեռախօսի կապը կը պահպանենք Ձեզ հետ, միշտ Ձեզ իրագեկ կը պահենք ճանապարհին պատահած կռիւների մասին, ես յոյս ունեմ, որ եթէ մեծ ուժերի հանդիպենք եւ Ձեր օգնութեան կարիքը զգանք՝ չէք մերժի մեզ օգնութեան հասնելք: Սորան պատասխան ստացալ, թէ «Կ՝աշխատե՛մ» (ՀԱԱ, ֆոնդ 402, ցուցակ 2, գործ 10, թերթ 93-94): Բարեբախտաբար, ճանապարհին, բացի մի քանի փոքրիկ ընդհարումներից, կամավորները որեւէ դիմադրութեան չեն հանդիպում: Մայիսի 5ի երեկոյեան Խեչոյի (Դաշնակցական Խեչօ, Խաչատուր Ամիրեան-Գէորգեան) հեծելավաշտը հասնում է Վան: Նրան դիմաւորում է Արամը: Մայիսի 6ին, առաւօտեան ժամը 6ին, քաղաք են մտնում կամավորական Բ., իսկ ժամը 12ին՝ Դ. գնդերը, ապա Բայազետի Ջոկատի հիմնական ուժերը:*

³⁵ 1915 Ապրիլի 1ին Շատախ գաւառի Կենտրոն Թաղում սկսում են ինքնապաշտպանական մարտեր: Թաղը, որ բաժանում էր երեք թաղամասերի՝ Վերին, Ներքին եւ Ջրաղացի, գտնուում էր Սիվտկնա եւ Վերին Տիգրիս գետերի միախառնման եւ երեք խորունկ ձորերի միացման վայրում: Արմենակ Եկարեանի վկայութեամբ, Շատախը յայտնի էր օսմանեան բռնատիրութեան դէմ իր ընդվզումներով: Նկատի ունենալով տեղի հայության յամառ եւ անզիջում պայքարը թուրք եւ քուրդ հարստահարողների դէմ, Եկարեանը գաւառը համեմատում է Ջէյթունի հետ (*Յուշեր Արմենակ Եկարեանի*, Գահիրէ, Տպ. Աստղ, 1947, էջ 185): Մայիսի 14ին Թաղ է հասնում Հայկական Կամավորական Բ. Գունդը՝ Դրոյի հրամանատարութեամբ: Բացի Վանից եւ Շատախից, ինքնապաշտպանական մարտեր են ընթանում նաեւ Գաւաշում, Փեսանդաշտում եւ այլ վայրերում:

- ³⁶ 1915 Մայիսի 7ին ռուսական հրամանատարությունը Վանի ժամանակաւոր կառավարիչ (նահանգապետ) է նշանակում ազատագրական շարժման ակնաւոր գործիչ, ՀՅԴ անդամ Արամ Մանուկեանին (Սարգիս Յովհաննիսեան): Փաստօրէն, հայութիւնը ԺԸ. դարում Սինիքի եւ Արցախի հայկական իշխանութիւնների կորստից յետոյ հնարատրութիւն է ունենում ստեղծել իր ինքնավար մարմինը:
- ³⁷ 1915 Յունիսի սկզբին Վանում կազմաւորում է գեներալ Տրոխիմի ջոկատը, որը բաղկացած էր Երեւանեան սահմանապահ գումարտակից, Ջաբկալեան Բ. Առանձին Կազակային Բրիգադի 12 հարիւրեակներից, Կովկասեան Լեռնահեծելագորային Մարտկոցից, Արարատեան եւ Ա. խմբերից: Միատրումից յետոյ հայ կամաւորների ընդհանուր մարտակազմը հասնում է 5500 հոգու:
- ³⁸ Նկատի ունի Քաղաքամէջը:
- ³⁹ Վանի ինքնապաշտպանութեան ժամանակ, բացի Մարտական, Կարմիր Խաչի, Ջինագործական եւ այլ ստորաբաժանումներից, կազմակերպուել էր Ամրաշէն խումբը՝ մօտ 1800 հոգի, որը սակրատրական բնոյթի աշխատանքներ էր կատարում: Նրա անդամները պաշարման ընթացքում կառուցում էին դիրքեր, խրամատներ եւ այլ տեսակի ամրութիւններ ու միաժամանակ հակառակորդի կրակի տակ վերականգնում էին թնդանօթների կրակից վնասուած կամ քանդուած դիրքերը:
- ⁴⁰ Նիկոլ Աղբալեան (1873-1947)՝ հայ քաղաքական-պետական գործիչ, գրականագետ, ՀՅԴ անդամ: Առաջին Համաշխարհային Պատերազմի տարիներին գործուն մասնակցութիւն է ունեցել կամաւորական շարժմանը եւ մարտական գործողութիւններին: 1914 Սեպտեմբերի 10ին ընդգրկուել է «Հայ Կամաւոր Խմբերի Կարգադրիչ Մարմին»ի կազմում: 1915 Յուլիսի 10ին նշանակուել է Արարատեան Գնդի աւագ համհարգ, Քանաքեռ գիւղում (ներկայումս Երեւանի տարածքում) տեղակայուած պահեստային խմբի հրամանատար: 1918 Մայիսի 28ին Հայաստանի անկախութեան հռչակումից յետոյ ընտրուել է խորհրդարանի անդամ, իսկ 1919ին նշանակուել է Լուսաւորութեան Նախարար: Հայաստանում խորհրդային կարգեր հաստատուելուց յետոյ, 1921 Փետրուարին ձերբակալուել է, սակայն Փետրուարեան Ապստամբութիւնից յետոյ ազատուել եւ հեռացել է արտասահման: 1930ին բնակուել է Բէյրութում, որտեղ զբաղուել է մանկավարժական գործունէութեամբ (R. Shatirian, “Kratkiy Ocherk Deyatelnosti Armyanskikh Dobrovolcheskikh Drujin 1914-1916gg.», (համառօտ ակնարկ հայ կամաւորական խմբերի գործունէութեան 1914-1916թթ.), *Armyanskiy Vestnik*, Մոսկուա, թիւ 10-11, 12 Մարտի 1917, էջ 13. նաեւ՝ ՀԱԱ, ֆ. 1267, ց. 2, գ. 50, թ. 111):
- ⁴¹ Նկատի ունի Վանի Թագաւորութեան ժամանակ Սենուա արքայի (Ք.ա. 810-786) կառուցած ջրանցքը, որի երկարութիւնը 42 կմ. է եւ գործում է առ այսօր:
- ⁴² Գաւառապետն էր Լեւոն Գաբրիէլեան, նրա օգնականը՝ Ջաւէն Կորկոտեանը, իսկ ռուսերէն թարգմանիչը Հ. Պալապեքեանը:
- ⁴³ Ախավանք, Ախավանաց, Ահավանք՝ գիւղ Վասպուրականի Ռշտունիք գաւառում, Վանայ լճի հարաւային ափին, Աղթամար կղզու դիմաց: Ի. դարի սկզբին ունէր 250 հայ բնակիչ: Աղթամար վանքի նաւահանգիստն էր: Պատմիչ Թովմա Արծրունին Ախավանքը յիշատակում է որպէս Աղթամար վանքի կալուածք:
- ⁴⁴ Գազիկ Արծրունի (879-մօտ 943)՝ Վասպուրականի թագաւոր 908ին:
- ⁴⁵ Անդրանիկ (Օգանեան, 1868-1927)՝ հայ ազգային-ազատագրական նշանաւոր գործիչ, ֆիդայի: Մասնակցել է հայրուկային մի շարք կռիւների: Ղեկավարել է 1904ի Սասունի հայութեան ըմբոստութիւնը: Բալկանեան Առաջին Պատերազմի ժամանակ (1912 Հոկտեմբերի 9-1913 Մայիսի 30) հայկական առանձին կամաւորական վաշտի հրամանատար Գարեգին Նժդեհի տեղակալ: Առաջին Համաշխարհային Պատերազմի ռուս-թուրքական ռազմաճակատում Հայկական Ա. Կամաւորական Խմբի հրամանատար: 1918 Յունուարին նշանակուել է Հայկական բանակային կորպուսի դիլիզիայի հրամանատար: Նոյն ամսում նրան շնորհուել է ռուսական բա-

- նակի գեներալ-մայորի կոչում: ՀՀ կառավարության հետ ունեցած տարակարծու-
թիւնների պատճառով 1919ին հեռանում է արտասահման:
- ⁴⁶ Կայծակ Առաքել (Տիգրան Աբաջեան, 1869-1916)՝ հայ ազատագրական շարժման
գործիչ, ֆիդայի, ՀՅԴ անդամ: 1904ին Սասունի ապստամբության մասնակից:
1905-1906՝ հայ-թաթարական (ադրբեջանական) ընդհարումների ժամանակ գործել
է Երեսանում: Մասնակցել է պարսկական յեղափոխությանը (1905-1911): Մասնակ-
ցել է 1915 Ապրիլի 7ից մինչև Մայիսի 4ը Վանի Այգեստան թաղամասի ինքնա-
պաշտպանությանը, եղել է Վանի Զինուորական Մարմնի անդամ: 1916-1917՝
Երզնկայում զբաղուել է հայ գաղթականների օգնության եւ թուրքերի մօտ բռնի
պահուող հայ երեխաների, կանանց եւ աղջիկների փրկութեամբ:
- ⁴⁷ Սարգիս Մեհրաբեան (Խանասորի Վարդան, ?-1943)՝ հայ ազգային-ազատագրա-
կան շարժման գործիչ, ՀՅԴ անդամ: 1890ին աշխուժ մասնակցութիւն է ունեցել հայ-
դուկային շարժմանը: 1896ի գարնանը ղեկավարել է Շատախի ինքնապաշտպանու-
թիւնը: 1897ին գլխավորել է Խանասորի արշաւանքը: 1905-1906՝ հայ-թաթարական
բախումների ժամանակ ղեկավարել է Ղարաբաղի հայութեան ինքնա-
պաշտպանական կռիւները: Պատերազմի սկզբում գլխավորել է Հայկական Ե. Կա-
մատրական Գումուրը, որը զէնք չլինելու պատճառով չի մասնակցել մարտական գոր-
ծողութիւններին: 1915 Ապրիլի 1ից գլխավորել է Արարատեան Գումուրը: Կամատրա-
կան զնդերի լուծարումից յետոյ հեռացել է քաղաքական գործունեութիւնից: Ունի
անտիպ յուշեր:
- ⁴⁸ Դրօ (Դրաստամատ Կանայեան, 1884-1956)՝ նշանավոր ռազմական, քաղաքական
եւ պետական գործիչ: 1914-1916՝ Հայկական Բ. կամատրական խմբի հրա-
մանատար: 1917 Դեկտեմբերին նշանակուել է Հայկական Ազգային Կորպուսի
կոմիսար: 1918 Մայիսին ղեկավարել է Բաշ Ապարանի ճակատամարտը: 1920
Նոյեմբերին նշանակուել է ՀՀ Զինուորական Նախարար: 1920 Դեկտեմբերի 2ին
Հայաստանի խորհրդայնացումից յետոյ, որպէս անցման շրջանի զինուած ուժերի
հրամանատար, ղեկավարել է իշխանութիւնը մինչև Յեղկոմի Երեսան ժամանելը:
1923ին հեռացել է արտասահման:
- ⁴⁹ Քեռի (Արշակ Գաւաֆեան, 1858-1916)՝ հայ ազգային-ազատագրական շարժման
գործիչ, ՀՅԴ անդամ: Մասնակցել է 1904ի Սասունի ինքնապաշտպանութեանը եւ
1905-1906՝ հայ-թաթարական ընդհարումներին: 1908ին պարսկական յեղափոխու-
թեան ժամանակ Եփրեան Խան Գաւաֆեանի օգնականն էր: 1914-1916՝ գլխավորել է
Հայկական Դ. Կամատրական Գումուրը: Աչքի է ընկել Սարիղամիշի ճակատա-
մարտի ժամանակ, որի ընթացքում իրեն դրսեւորել է որպէս հմուտ հրամանատար:
Զոհուել է 1916ին Ռեւանդուզ քաղաքի մօտ տեղի ունեցած ճակատամարտի ժամա-
նակ:
- ⁵⁰ Խեչօ, Դաշնակցական Խեչօ (Խաչատուր Ամիրեան-Գեորգեան, 1868-1915)՝ հայ
ազատագրական շարժման գործիչ, ՀՅԴ անդամ: 1897ին մասնակցել է Խանասորի
արշաւանքին եւ 1905-1911՝ պարսկական յեղափոխութեանը: Առաջին Համաշխար-
հային Պատերազմը սկսելուց յետոյ զինուորագրուել է հայ կամատրական շարժ-
մանը, սկզբում եղել է Դրոյի օգնականը, իսկ 1915 Ապրիլի 1ին Արարատեան Գումուրի
կազմաւորուելուց յետոյ նշանակուել է Վարդանի տեղակալ եւ հեծելավաշտի
հրամանատար: Զոհուել է 1915 Յուլիսի 6ին: Ինչպէս նշում է Ս. Վրացեանը. «*Խեչօյի
մահը, կարծես, խորհրդանիշ եղաւ: Նրանից յետոյ մենք ուրախ օրեր չտեսանք*
(Հորիզոն, Թիֆլիս, N 2, 3 Յունուարի, 1916):
- ⁵¹ Միքայէլ Արզումանեան°:
- ⁵² Համազասպ Սրուանձտեան (1873-1921) հայ ազգային-ազատագրական շարժման
գործիչ, ՀՅԴ անդամ: 1905-1906՝ հայ-թաթարական ընդհարումների ժամանակ
կազմակերպել է Ղարաբաղի, մասնատրապէս Գանձակի հայութեան ինքնապաշտ-
պանութիւնը: 1908ին ձերբակալուել է ռուսական իշխանութիւնների կողմից յօրին-

ուած «Դաշնակցութեան գործի» հետ կապուած եւ դատապարտուել է 15 տարուայ քարտի, որը կրելու էր Միքիլում: 1913ին յաջողուել է փախչել քարտավայրից: ՀՅԴԸ. Ընդհանուր Ժողովի պատգամատուր (Գումարուած 1914ի Յուլիսի 25-Օգոստոս 17): Առաջին Համաշխարհային Պատերազմի տարիներին եղել է Գ. Կամատրական Գնդի հրամանատար: Մասնակցել է 1918ի Բաքուի հայութեան պաշտպանութեանը: Հայաստանի Հանրապետութեան կազմաւորումից յետոյ նշանակուել է Նոր Բայազէտում (այժմ՝ ՀՀ Գեղարքունիքի մարզ, ք. Գաւառ) տեղակայուած զօրքերի հրամանատար: Հայաստանում խորհրդային կարգեր հաստատուելուց յետոյ ձերբակալուել եւ 1921 փետրուարին սպաննուել է Երեսնի քանտում:

⁵³ Եայթա՝ քաղաք Ուկրաինայում, Սեւ Ծովի Դրիմի թերակղզու հարաւային ափին:

⁵⁴ Կարծում ենէ, որ Ա-Դ-օն այս թուաքանակի մէջ չի մտցրել Ալաշկերտի հովտի, Պարսկահայքի (Հիւսիսային Ատրպատական) հայութեանը, քանի որ նշուած շրջանները համարում էին Արեւելեան Հայաստան: 1915-1916ին դեռեւս ամբողջութեամբ յայտնի չէր հայութեանը հասցուած արհաւիրքի ողջ ծաւալը:

⁵⁵ 1914 Ապրիլի 14ին «Տիտանիկ» շոգեմար, որը Սաութհեմփտընից (Մեծն Բրիտանիա) գնում էր դէպի Նիւ Եորք, բախտում է մի հսկայ սառցաբեկորի, որի հետեւանքով 1316 ուղեւորից եւ անձնակազմի 908 անդամից փրկուում են միայն 711 հոգի:

⁵⁶ Երլըզ (թուրք. Yildiz Sarayı՝ աստղային պալատ), սուլթան Աբդուլ Համիդ Բ.ի նստավայրը:

ASPECTS OF THE HISTORY OF THE ADMINISTRATION OF VAN
(JUNE 14-JULY 7-JULY 25, 1915) AND A-DO
(Summary)

RUBEN SAHAKYAN
rubensahakian@mail.ru

During WWI the Ottoman Empire launched its plans of massive extermination and deportation and carried out its genocidal policy against the Ottoman Armenians. In reaction to these acts, certain Armenian towns and cities of Western Armenia and Asia Minor took up arms in self-defense.

The population of the city of Van was the first to take up arms against the Turks. The defense of the city extended from April 7 to May 4, 1915. Eventually they were rescued by the Armenian volunteer troops of the Russian Army, who were the first to arrive to Van.

On May 7, the Russian Army command appointed Aram Manoogian as administrator of Van and its provinces. In a short period Manoogian established a regional administration and its subsidiaries, which won the trust of the population. Soon Eastern Armenian scholars with administrative experience volunteered to work in the municipality of Van. In recruiting administrators Manoogian prioritized competence over partisanship and social stature.

The author notes that since the disappearance of the Armenian princedoms of Sunik and Artsakh in the 18th century, this was the first time Armenians had had the chance to establish a political entity in an area exclusively inhabited by Armenians, as the Turks had left the area. Nonetheless, the Russian authorities were unhappy with the activities of the Armenian administration and particularly concerned with the fact that Van could become the center of an Armenian autonomous region.

On July 11, 1915 the Russian authorities ordered the retreat of the army, for no real reason. The retreat occurred haphazardly, and the Armenian authorities had no time to organize the defense of the city. The Armenians were left with no choice but to leave the city and take refuge in Eastern Armenia. The experience gained by Manoogian during this period became an asset for him as he later on assumed the *de facto* leadership of the Yerevan Armenian National Council and, as of July 1918, held the post of Interior Minister of the Republic of Armenia.

Against the backdrop of these developments Sahakian brings to light the eye-witness account of Hovhannes Der Krikorian (1867-1954), one of the best Armenian intellectuals of the time. Der Krikorian, known to scholarly circles by the name of A-Do, extensively researched Armenian liberation movements, socio-economic conditions, the administrative structure as well as gathering statistics on the population and settlements of Western Armenia. He personally went through the region of Van, registering and taking and took details of the resistance fights as well as details on the massive massacres of the Armenians, and published them as a research book in 1917.